

經

大醫積經

四十六之
五十一

鳥

C40
4514
26

30 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 2



了翁上座請六藏及百
家書置之武州紫雲山
我微英塔院庫府中永
為學者不敢許出院內
當山二世鐵十機謹誌

大寶積經卷第四十六

唐三藏法師玄奘奉詔譯

菩薩藏會第十二之十二

毗梨耶波羅蜜多品第九之二

復次舍利子當來之世法欲滅時復有菩薩摩訶薩
安住大乘行毗梨耶波羅蜜多者見如是等諸惡眾
生誹謗毀滅是正法已倍增振發勇猛正勤大精進
力於是經典大菩薩藏微妙法門慇懃聽受書持讀
誦廣為他人開示演說舍利子如是菩薩摩訶薩當
於爾時應起四想何等為四舍利子所謂我父寶藏



C40-4514

B 64853

01234567892001234567892101234567892

不久當滅由為此故佛薄伽梵釋迦牟尼如來應正
等覺於百千那庾多拘胝無數大劫精勤修習難行
苦行方乃獲是正法寶藏是故我當發勤精進奉持
此藏徧持此藏極當徧持廣通此藏欲令法寶久不
滅故舍利子譬如有人惟有一子憐念愛重具大福
相觀無狀足是人後時欲有所趣而携此子將涉危
難恐顛墜故以手執持又等徧持極等徧持勿令我
子墮險難處如是舍利子彼善男子亦復如是深懷
奉信敬重於我不捨如是無上法寶志恒希求清淨
寂滅雖經惡世而能攝受毘勝正法舍利子我今以

此菩提因緣無上正法付囑是人又舍利子譬如世
間大軍戰時少有衆生爲護衆故處於前陣惟有果
敢雄猛丈夫合率驍勇抗拒勅敵爲護已衆處大軍
前振威而住如是舍利子於當來世正法滅時壞正
法者當現前時有諸衆生發起深心欣樂寂滅而能
於是無上法寶乃至受持少分要義當知是人亦復
如是被於正勤堅固甲冑奮發勇猛大精進力摧碎
諸魔所有軍陣何以故舍利子若有衆生於是經典
乃至受持一四句頌不生誹謗隨喜讚歎言此經典
真是佛說於多人前廣宣顯示者當知是人卽爲隨

喜讚說去來現在諸佛所說經法舍利子如來不說
是人但得少分功德果報我說是人乃能成就如虛
空量大功德聚何以故舍利子我說是等名爲善人
如是善人甚爲難得謂知恩者及報恩者舍利子如
是知恩及報恩者當知是爲人中珍寶又舍利子於
當來世正法滅時諸惡魔等威勢現時若有衆生於
如來所信重不捨受持是經無有遠離我說是人第
一丈夫爲善丈夫爲勝丈夫爲健丈夫爲大丈夫當
知是人則爲如來勝法朋侶非爲詐現朋惡黨者當
知是人行實行者如是舍利子菩薩摩訶薩應當修

習堅固正行乃至命終中無暫廢於諸佛所當勤衛
護乃至命終中無暫廢於正法所當勤攝受乃至命
終中無暫廢甚深空法當勤信解乃至命終中無暫
廢舍利子是爲菩薩摩訶薩於後惡世所起四法若
有成就如是四法菩薩摩訶薩於當來世法欲盡時
謗正法時滅正法時犯戒徒黨大強盛時熾然追求
順世外道惡咒術時劫濁亂時有情濁時壽命濁時
煩惱濁時諸見濁時菩薩摩訶薩當於爾時應住三
處而爲依止何等爲三所謂應住阿蘭若處應住諍
息滅處應住佛菩提處舍利子是爲菩薩摩訶薩當

來惡世住於三處應如是持是則具足毗梨耶波羅
蜜多故爾時世尊欲重宣此義而說頌曰

於最勝法不遠離

爲盡生老病死苦

常勤精進無妄念

當速成就自他利

若有於是善說法

聞已安住正思惟

當知我爲彼大師

彼則是我真弟子

若不聽聞如是法

設聞不住正思惟

是人當趣諸惡道

猶彼衆流歸大海

百千俱胝那庾劫

諸佛出現甚爲難

雖復暫遇不親奉

當隨惡魔自枉轉

復次舍利子乃往過去九十一劫當於爾時有佛出
世名曰勝觀如來應正等覺明行圓滿善逝世間解
無上丈夫善調御士天人師佛薄伽梵舍利子彼佛
法中有六苾芻行諸惡行恒相隨逐一名善見二名
善樂三名歡喜四名調善五名蘇逾遮六名火天授
舍利子是六苾芻恒說非法有我有入有常有斷結
固周旋更相信任趣深隱所同共謀議我等應當各
各誘化人別百家用爲徒黨又令百家傳告眷屬如
是展轉親姻傳告或當至於五十百等作是議已便
往教化若村若城郊野店肆或至王都及餘邦國一

一諸家悉皆往趣既到彼已不說正法於佛世尊先
 行毀謗舍利子彼惡苾芻云何毀謗舍利子諸惡苾
 芻告衆人言世間決定有我有衆生有壽命者有數
 取者若諸世間定無有我及諸法者誰去誰來誰坐
 誰卧誰語誰默誰能行施誰是所受誰能受用誰受
 苦樂誰有能受不苦不樂若有人來語汝等言世間
 決定無我無衆生無壽命者無數取者當知是人爲
 汝等怨非汝善友舍利子爾時諸惡苾芻重更誘化
 婦人丈夫及以男女作如是言若有人說無我等法
 當知其人爲不善者爲暴惡者是汝惡友非汝善友

復更化言汝等諸人是聰慧者深能領解我所說義
 自今已往若諸惡友非善友來當爲汝說世間決定
 無我等法汝等不應輒相親昵交頤往還承事供養
 舍利子諸惡苾芻行如是化於半月間人各誘得滿
 五百家歸從其見舍利子爾時有諸苾芻是阿羅漢
 永離一切煩惱垢穢而是勝觀如來應正等覺真實
 弟子爲乞食等諸因緣故詣彼諸惡苾芻所化之家
 暫至其門便爲婦人丈夫及諸男女所共毀罵非理
 訶責以麤惡言面陳挫辱爲諸苾芻而說頌曰

汝等不能知正法
 汝等迷失於聖道

汝等退捨於淨教 汝等皆當墮地獄

舍利子彼諸人等說是語已於阿羅漢倍更訶罵既訶罵已復以種種言詞而罵於佛即於佛前說伽陀

曰

如來所說法虛妄 所謂諸行悉無常

又說諸法皆無我 及以無恒無不變

諸行都無有堅實 皆為虛偽忘失法

所說空華無所有 但能誑惑彼愚夫

舍利子彼諸人等說如是語輕毀佛已倍增憤恚又於佛前說伽陀曰

如來所說一切法 決定無我無眾生

無有壽命無數取 亦無作者及受者

而今現見諸世間 有能行施及所受

并餘種種受用人 及覺廣大諸受等

當知宣說定無我 一切皆應墮惡道

舍利子當爾之時諸不善人同聲說是非法語者大小男女有六十八俱胝千眾生皆惡茲芻所化導故行是惡業彼命終已同生無間大地獄中受身麤大魚形人首其舌長廣彌布於地周徧下釘如殖薑田又於舌上眾多鐵犁常以耕之彼一一身又為一百

極惡商估之所喫食又於空中大熱鐵丸猛焰赫然
光色熾盛從空而墮常雨其身是諸罪人以惡業故
受如是等種種楚毒爾時世尊欲重宣此義而說頌
曰

鐵丸猛焰如飛電

可畏無量百千種

當於其身而墮墜

熾然恒受種種苦

又於身內徧流轉

炎熾猛威難逢近

騰焰高踊百由旬

流火徧出身毛孔

又彼衆生一一舌

盡爲無量鐵犁耕

一切舌分皆分裂

如是苦受恒纏繞

斯由親近惡友已

能感如斯大苦聚

又由遠離具戒者

致令速墮於惡道

舍利子時彼非法六惡苾芻由惡教故命終之後皆
生阿毗大地獄中一一受身縱廣等量三十踰繕那
彼一一身皆生千口一一口中各生二舌是一一舌
廣長量等四踰繕那一一舌上有五百鐵犁鐵牛挽
之以耕其舌是諸罪人雖受苦痛大苦逼故不逞號
叫又於頭上各有萬億獄卒手執害具刀鋸矛稍斫
刺破裂壞其身首在此獄中壽萬億歲如是展轉復
往諸餘大地獄中具受辛酸種種苦楚何以故由彼

驥毀佛聖教故舍利子當於爾時有大長者名曰安
隱財富無量資產具足多諸珍寶金銀瑠璃珊瑚末
尼真珠貝玉無不備有又多僕使奴婢財穀庫藏皆
悉盈滿爾時長者爲惡苾芻之所教化既受其語生
於斷見長者有妻名爲焰慧容色盛美爲人所重彼
生一男形貌端嚴衆覩無狀成就第一圓滿淨色曾
於過去無量百千那庾多拘胝佛所植諸善本當初
生時三返微笑又發是言奇哉奇哉云何今者生斷
見家其母聞已驚恐惶懼身毛爲豎與諸女人棄之
逃避舍利子時諸女人欲審悉故還來近住觀察是

兒爲何等類天耶龍耶爲藥又耶爲健達縛爲阿素
洛爲揭路荼爲緊捺洛爲牟呼洛伽爲究槃荼爲畢
舍遮人非人耶舍利子時此嬰兒再發是言告諸女
曰汝雖怖走我甚安樂時此嬰兒爲諸女人而說頌
曰

汝當樂義利 於義利勿怖 我當度汝等

令脫於邪道 汝安隱勿怖 應怖前惡友

我當度汝等 令脫於邪見

舍利子時彼父母及餘大衆聞是嬰兒說伽陀已便
往兒所爾時嬰兒爲其父母而說頌曰

家中凡所有 廣大諸財穀 速持來見與
 供佛及聲聞 彼大聲聞眾 照世勝觀尊
 三界圍輪中 都無與等者 彼大聲聞眾
 照世勝觀尊 廣闡揚妙法 利益諸羣品
 彼大聲聞眾 照世勝觀尊 身具三十二
 大丈夫威相 彼佛聲聞眾 猶如烏曇華
 名稱甚難聞 過億俱胝劫
 舍利子時兒父母聞是法已即取家中二十俱胝上
 妙財寶將至兒所而語之言此諸財寶是汝父母所
 有之物汝當取之隨汝志意生信之所任持奉施爾

時父母即為是兒而說頌曰

此是汝父母 所致諸財寶 隨心所敬信
 汝當持布施 若金若珍寶 家中甚豐積
 隨心所敬信 汝當持速施 衣服坐卧具
 華鬘及塗香 隨心所敬信 汝持歡喜施
 於佛及法僧 無上福田所 為利諸羣生
 當應行布施
 舍利子爾時嬰兒聞其父母所說頌已復為父母而
 說頌曰
 我今往勝觀 世間依怙所 當廣設供養

爲利羣生故 諸有欲希求 天上人中樂

應隨我所詣 勝觀如來所

舍利子爾時嬰兒以念正知觀視四方白父母曰父母當知我今應往薄伽梵勝觀如來應正等覺所於是衆人聞是語已皆大驚愕云何嬰兒當初生日便能與人往返言議又能徒步有所造詣時有八萬四千衆生聞是奇異皆來雲集而作是言我等當觀此嬰兒者是何等類爲天爲龍爲藥叉耶乃至爲畢舍遮人非人耶舍利子爾時嬰兒與諸大衆八萬四千前後圍繞往詣勝觀如來所止之處當此嬰兒往佛所時以福德力恐爲風日所損弊故於上空十千寶蓋自然而現用覆其身又於嬰兒所由之路虛空之中羅布金網雨上妙華及細末香超勝諸天常所散香扇清涼風與天香合周流飄散相續不斷虛空諸天又於行路以諸香水而用灑之覆以金羅種種珍服又彼諸天雨華布道光采相曜積齊于膝於其道側無量百千清涼池沼自然出現八功德水具足盈滿生諸妙華所謂殞鉢羅華鉢特摩華拘買陀華奔荼利華含發鮮榮彌滿池內又有鳧鴈鴛鴦異類衆鳥遊戲水上舍利子時彼嬰兒所由之路七寶欄

循以界道側諸天妓樂具無量千深遠妙音自然而發左右寶樹行列莊嚴於大道中復施華路現於身
前爲供養故以待嬰兒遊履其上於其華路承步諸
華舉足之時自然隱沒及將下足華便踊現爾時嬰
兒遊此華道經須臾頃即便迴顧觀諸大衆說伽陀

曰

汝等無理不應行 異我此路餘非理

而我常遊此正理 故往有理最勝處

超過無量那庾劫 時復一福遇人身

時有一佛出世間 時勤修得淨信慧

舍利子爾時嬰兒爲諸大衆說伽陀已於虛空中有
八萬四千諸大天子同聲讚言善哉善哉便說伽陀
讚嬰兒曰

善哉善哉大智慧 汝所宣說會正理

仁者後顧爲無理 有正理者當前趣

舍利子爾時嬰兒又以伽陀報諸天曰

汝諸天等所宣說 有理無理之正言

我今問汝汝當答 有理無理之實義

舍利子爾時諸天復以伽陀報嬰兒曰

若樂欲住諸財寶 不樂出離所行處

如是無理諸凡愚

安住地獄之前道

若樂捨家趣非家

當應捨欲棄財寶

是人於世有正理

不久便開解脫門

舍利子爾時嬰兒復以伽陀報諸天曰

如汝所說理無理

觀汝全未能明曉

如有理無理義

我深於此正開悟

舍利子爾時嬰兒說是語已即便前進趣薄伽梵毗鉢尸如來應正等覺大會之所既到彼已頂禮佛足右遶三匝却住一面於薄伽梵勝觀如來深生敬仰即

即以伽陀而讚頌曰

常行利益諸世間

勝觀三明施甘露

如大龍象大師子

由是我今常敬禮

世間明照甚難得

猶如烏曇跋羅華

爲世依怙作光明

形色微妙甚圓具

世間衆苦所逼迫

不能了知真聖道

踰越正路一迤逆

譬等生盲處於世

願我此世當成佛

如今勝觀人中尊

當拔衆生無量苦

及救三火燒然者

如是無邊百千衆

皆隨我來至於此

惟願演宣微妙法

悉令安住上菩提

舍利子爾時嬰兒說是頌已白勝觀如來應正等覺
言世尊願我來世於此世間當成如來應正等覺爲
諸衆生顯揚正法亦如今者勝觀如來爲諸大衆廣
說妙法爾時會中有八萬四千衆生復白勝觀如來
言世尊我等亦願於當來世得成如來應正等覺爲
衆生故顯揚正法亦如今者勝觀如來等無有異爾
時勝觀如來應正等覺了知如是八萬四千人增上
意已卽便微笑舍利子諸佛法爾於微笑時有種種
光青黃赤白紅頗胝色從佛面門自然而發徧照無
量無邊佛之世界上至梵世映蔽一切日月光明其
光徧照所應作已而復還來右遶勝觀如來百千而
已從薄伽梵頂髻而入舍利子爾時勝觀如來有一
侍者覩佛神變現微笑已從坐而起徧覆左肩以右
膝輪安處于地向佛合掌曲躬禮敬卽於佛前以頌
問曰

我今問佛勝觀尊

端嚴希有生衆喜

何等因緣大善逝

現發微笑世間依

兩足世尊現微笑

其相非無有因緣

願演微笑因緣本

利益世間悲愍故

今有百千俱胝衆

現住牟尼世尊前

攝耳專注樂聽聞

願世間依愍衆說

佛爲一切衆生眼

爲舍爲救爲歸趣

能斷衆生諸有疑

憐愍世間利益者

如來善知諸過去

又能通達於未來

於一切法不生疑

及以現在諸佛土

徧智法王論自在

出過三世妙如來

我今請問世間依

何等因緣現微笑

佛能永斷他疑網

於一切法自無疑

八音暢宣微妙法

善拔衆生憂毒箭

我心喜踊難陳說

合十指掌懷恭敬

敢問法王大聖尊

何等因緣現微笑

舍利子爾時勝觀如來應正等覺告侍者曰苾芻汝
今見是嬰兒在我前不對曰唯然我今已見勝觀佛
言此嬰兒者往昔過去曾於六十四俱胝那由多百
千佛所供養恭敬尊重讚歎以諸衣服飲食卧具病
緣醫藥及餘資物持用奉施彼諸佛已爲欲趣向三
菩提故又於過去十那由多佛所修行梵行迴向阿
耨多羅三藐三菩提苾芻當知今是嬰兒所將大衆
八萬四千於過去世並是嬰兒本生父母何以故此
嬰兒者曾於過去發如是願願我經生在在處處所

有父母皆令安住於佛菩提又令諸母更無第二再
受女身由是願故彼諸衆生至于今日隨逐嬰兒來
至我所又隨修學發於無上正等覺心爾時勝觀如
來欲重宣此義爲侍者苾芻而說是頌

苾芻當觀此嬰兒

及現前住多千衆

其心踊躍發誠言

願我當來如法王

當知曾於過去生

如上數量諸佛所

恭敬供養大導師

利益天人世間者

於十那庾諸佛所

依佛捨家持正法

常行最勝之所行

爲求無上菩提故

汝觀八萬四千衆

今現皆住如來前

曾於久遠過去世

悉是嬰兒之父母

又此嬰兒曾發願

諸有生生父母者

普令安住上正覺

更不重受女人身

彼皆隨學嬰兒行

發菩提心於我所

今我皆當授彼記

方將爲世兩足尊

由此因緣現微笑

彼昔勝行我能知

及以未來諸所作

當證人中大聖主

諸天龍神及人等

無量百千那庾多

聞佛爲彼授記已

於勝觀尊生大喜

舍利子爾時嬰兒聞佛授記心生歡喜踊躍無量悅
意忝然得未曾有速疾往詣其父母所說伽陀曰

如是多千衆 我前生父母 皆已住菩提

父母心何趣

舍利子爾時父母復以伽陀報其子曰

如子志所趣 我心亦如是 當成一切智

此決定無疑 子已生我家 願後勿相捨

常當憶念我 令速證菩提

舍利子爾時嬰兒復以伽陀報父母曰

我諸所化導 皆願先成佛 最後我當成

照世人調御

舍利子汝今當觀彼過去世勝觀如來法中嬰兒者
豈異人乎勿作餘疑今大自在天子是也從是已後
又經俱胝那更多劫更不退墮過是劫後生轉輪王
聖種族中彼當來父號曰名稱如我今父淨飯大王
彼當來母號曰離暗如我今母摩訶摩耶彼當來子
號曰無憂如我今子羅睺羅舍利子彼既出家悟菩
提已得成爲佛名曰大悲如來應正等覺十號具足
其佛壽量滿百千俱胝歲佛身常光徧照所及十踰
繕那佛說法處大會充滿百踰繕那大悲如來處世

01234567892001234567892101234567892

經

菩薩摩訶薩

卷

鳥六

教化爲度聲聞三會說法第一大會度諸弟子有百
 俱胝第二大會度諸弟子有那庾多俱胝第三大會
 度諸弟子有百千那庾多俱胝舍利子其弟子中滿
 一俱胝皆是大阿羅漢諸漏已盡無復煩惱得自在
 慧具八解脫成就靜慮及六神通舍利子大悲如來
 所度聲聞阿羅漢衆如上所說三會數量彼菩薩衆
 其數亦等皆是往世所生父母彼佛世尊宣說妙法
 利益無數諸衆生已然後涅槃佛滅度後正法住世
 滿俱胝歲分布舍利饒益衆生亦如我今般涅槃後
 流布供養等無有異舍利子安住正勤菩薩摩訶薩

亦復如是修行毗利耶波羅蜜多時爲求阿耨多羅
 三藐三菩提故能於是經修行正法倍增振發勇猛
 正勤大精進力度脫無量諸衆生等我說是人爲善
 丈夫思覺觀察不倦不退勇猛精進明繫在心舍利
 子云何菩薩摩訶薩不倦精進舍利子菩薩摩訶薩
 爲衆生故求菩提時不應限以數量而有所求何以
 故菩薩摩訶薩不作是念於爾所劫我當流轉於爾
 所劫我不流轉以如是故菩薩爾時被難思鎧處於
 生死作是念言假使如我前際所經生死如是更受
 勤苦經於生死倍過前際爲求菩提中無懈怠舍利

經

菩薩摩訶薩

卷

鳥六

子菩薩摩訶薩具足如是堅固弘誓則名成就不倦
精進復次舍利子菩薩摩訶薩云何修行勇猛精進
舍利子假使三千大千世界滿中熾火發起勇猛正
勤菩薩摩訶薩爲欲往覲彼如來故以精進力於是
熾火從中而過不怯不退又舍利子勇猛正勤菩薩
摩訶薩爲求聽聞大菩薩藏微妙法門故以精進力
雖逢是火從中直過而無怯退又舍利子假使三千
大千世界滿中熾火勇猛正勤菩薩摩訶薩爲欲宣
說大菩薩藏深妙法故以精進力於是熾火從中直
過而無怯退又舍利子假使三千大千世界滿中熾
火勇猛正勤菩薩摩訶薩爲欲生起善根因緣以精
進力於是熾火從中直過而無怯退又舍利子假使
三千大千世界滿中熾火勇猛正勤菩薩摩訶薩爲
欲利益諸衆生故以精進力能於中過如是爲欲令
他得寂靜故得調伏故雖逢是火皆由中過而無怯
退又舍利子發起勇猛不倦正勤菩薩摩訶薩爲欲
令他般涅槃故以精進力雖逢是火能於中過而無
怯退舍利子是名菩薩摩訶薩修行毗利耶波羅蜜
多勇猛之相復次舍利子發起勇猛不倦正勤菩薩
摩訶薩行毗利耶波羅蜜多時由不懈倦堅固不退

善根所發無上大悲之所熏故恒發勇猛大精進力於諸衆生常行化導又舍利子如是發起勇猛不倦正勤菩薩摩訶薩於一切時舉足下足常不捨離大菩提心於佛法僧恒生珍敬繫念在前於諸衆生恒徧觀察爲利益故不欲令被煩惱勢力之所逼奪又舍利子發起勇猛不倦正勤菩薩摩訶薩所有已生諸妙善根一切迴向無上菩提令此善根畢竟無盡譬如少水投于大海乃至劫燒中無有盡舍利子菩薩摩訶薩亦復如是以諸善根迴向菩提亦無有盡是名菩薩摩訶薩勇猛不倦大精進力又舍利子勇猛不倦精進菩薩摩訶薩以平等行積集善根於諸衆生起平等行積集善根爲欲引生一切智智積集善根爲欲利益諸衆生故積集善根舍利子如是無量諸大善根皆是菩薩摩訶薩勇猛無倦大精進力之所集起復次舍利子如是勇猛不倦正勤菩薩摩訶薩常應精進修學是法所得福聚無量無邊今當廣說福聚之相舍利子我觀世間一切衆生所有福聚無量無邊如是乃至一切有學無學所有福聚一切獨覺所有福聚轉復無量不可思議如上所有諸福聚等假使皆悉內置衆生一毛孔中如是衆生一

經

大智度論卷四十四

七

鳥

經

大智度論卷四十四

七

鳥

一毛孔皆有如上福德之聚無量無邊不可思議如是假使一切衆生一切毛孔所有福聚合集置一無關鍵會大法祠中舍利子如是法祠功德福聚倍增于百感得如來大丈夫身色相之一如是一一大丈夫相皆以如是功德所成如是一切如來身中大丈夫相所有福聚皆合成一眉間毫相如是入一眉間毫相福聚又過於此滿百千倍大功德聚合成如來頂上無能觀見烏瑟膩沙大丈夫相如是入一肉髻大功德聚又過於此滿於拘胝百千倍大功德聚合成如來大法商佉之相舍利子由此如來大法螺相爲無量種功德集成以如是故如來隨所意欲出大音聲徧告無量無邊一切世界爲諸有情廣說妙法如其根性隨聞信解悉令歡喜何以故皆由精進所修學故舍利子菩薩摩訶薩應作是念如是無上正等菩提雖極難得我當不捨精進鎧甲發大勇猛必定速悟無上菩提不足爲難旣成佛已隨我意欲於法螺相出大音聲徧告無量無邊一切世界爲諸衆生說微妙法隨根性解皆令歡喜舍利子是名菩薩摩訶薩勇猛無倦正勤之相復次舍利子勇猛無倦精進菩薩摩訶薩依毗利耶波羅蜜多故常應如是

精進修學由修學故具足成就一切智慧舍利子假使三千大千世界所有衆生一切成就隨信行智卽用此智欲以比一成就隨法行智百分不及一百分不及一百千萬分不及一僧佉分不及一迦羅分不及一伽拏那分不及一烏波摩分不及一烏波尼沙陀分不及一復次舍利子假使三千大千世界所有衆生一切成就隨法行智欲以比一第八人智百分不及一乃至烏波尼沙陀分不及一復次舍利子假使三千大千世界所有衆生一切成就第八人智欲以比一預流果智百分不及一乃至烏波尼沙陀分不及一復次舍利子假使三千大千世界所有衆生一切成就預流果智欲以比一乃至一來向智如是一來果智乃至欲比不還果智如是乃至欲比阿羅漢智若獨覺智若過百劫菩薩智若成就不退轉菩薩智如是乃至欲比繫屬一生菩薩智皆應廣說無量無邊一切世界所有衆生皆悉成就繫屬一生菩薩之智欲比如來十力之一處非處智百分千分百千萬分不及一僧佉分不及一迦羅分不及一伽拏那分不及一烏波摩分不及一烏波尼沙陀分不

及一乃至算數譬喻所不能及舍利子是菩薩摩訶
薩行毗利耶波羅蜜多故聞如來如是甚深智解之
時其心不驚無有怖畏於是智人生樂欲心發起正
勤中無廢捨作如是念我今修行勇猛精進假使我
身皮肉骨血筋脉髓腦皆悉枯燥爛壞無遺未得如
來如是處非處智力已來於其中間發大勇猛堅固
精進終無懈廢舍利子是名菩薩摩訶薩勇猛無倦
正勤波羅蜜多堅固之相應如是學復次舍利子菩
薩摩訶薩行毗利耶波羅蜜多故發大勇猛無倦正
勤常應如是精進修學由修學故能滅衆生諸煩惱
火舍利子假使一切衆生於過去世所有諸心皆入
衆生一心中轉如是衆生一一諸心乃至一切衆生
一一各有爾所諸心無量繁雜難可了知如是一切
衆生一一心中各具無量貪瞋癡等諸惑繁雜以此
一切衆生所有煩惱皆入一衆生一心中轉舍利子
假使展轉一切衆生皆具如是無量煩惱難可了知
菩薩摩訶薩作如是念我當策勵勇猛發勤精進尋
求如是智慧資糧隨我所發正勤之力於諸衆生貪
瞋癡火及餘熱惱我要當令息滅無遺斬除毒害摧
碎散壞同於灰燼速令衆生住涅槃道舍利子是名

菩薩摩訶薩勇猛無倦正勤波羅蜜多應如是學復次舍利子菩薩摩訶薩依毗利耶波羅蜜多故安住勇猛無倦精進常應如是正勤修學以修學故諸善身業無有休廢諸善語業無有休廢諸善心業無有休廢乃至所有一切正勤皆爲方便策進菩薩身語心業舍利子然諸世間但說菩薩身語二業精進第一不說菩薩心精進相舍利子菩薩摩訶薩心精進相無量無邊吾今略說何等名爲心精進相謂菩薩心修行正勤若進若止如是爲相舍利子云何名爲正勤進止舍利子菩薩修行大精進者爲菩提故勤行精進所言進者於諸衆生發起大悲所言止者謂無我忍所言進者攝諸衆生所言止者於法不取所言進者生死無倦所言止者不得三界所言進者一切盡捨所言止者不厭布施所言進者攝取淨戒所言止者不厭尸羅所言進者堪忍衆苦所言止者心無毀壞所言進者起諸善法所言止者心常遠離所言進者攝受靜慮所言止者心常寂滅所言進者聞法無厭所言止者如理善巧所言進者聽說無倦所言止者無戲論法所言進者求慧資糧所言止者斷諸戲論所言進者增長梵信所言止者眞智行捨所

言進者具五神通所言止者徧知漏盡所言進者修
諸念處所言止者念無功用所言進者正斷方便所
言止者善惡俱捨所言進者引發神足所言止者任
運作用所言進者諸根善權所言止者觀非根性所
言進者攝受諸力所言止者智無制伏所言進者生
菩提分所言止者智揀擇法所言進者求道資糧所
言止者無來往性所言進者求奢摩他所言止者心
住寂止所言進者資助勝觀所言止者伺察法性所
言進者隨覺諸因所言止者諸因徧智所言進者從
他聞音所言止者如法修行所言進者謂身莊嚴所
言止者謂法性身所言進者謂語莊嚴所言止者聖
默然性所言進者信解脫門所言止者無有發起所
言進者遠離四魔所言止者捨煩惱習所言進者方
便善巧所言止者觀察深慧所言進者觀察緣境所
言止者無功用觀所言進者觀察假名所言止者了
達實義舍利子諸如是等進止之相是名菩薩摩訶
薩惟心精進若諸菩薩摩訶薩聞如是等心精進相
應當發起勇猛無倦具足正勤舍利子如是名爲菩
薩摩訶薩修行正勤波羅蜜多無有厭倦勇猛精進
修習之相

大寶積經卷第四十六

校譌 第五紙八行便北 第六紙十七行威宋 第十

二紙六行而北

音釋 驍古亮切 抗拒抗若浪切抵也敵也 勅渠也

也 胄直又切 阿蘭若梵語也此云閑 誘與久切

誅誘 挫塵臥切摧也折也 唵色甲切 挽無遠切 驚愕

各切驚愕謂 盪鉢羅梵語也亦云優鉢羅此 燥

切乾 爛郎肝切 策勵策測革切策進也 灰燼燼也

黃州府知府常熟縣瞿汝稷施贊刻此
大寶積經第四十六卷
江潤賈國政書
進賢洪
荆門州沙彌清蓮對
鐫曆乙未仲夏經山與聖萬壽禪寺識

大寶積經卷第四十七

唐三藏法師玄奘奉詔譯

菩薩藏會第十二之十三

毗梨耶波羅蜜多品第九之三

復次舍利子如是勇猛無倦正勤菩薩摩訶薩成就

五種增進之法便能速悟阿耨多羅三藐三菩提舍

利子何等名為成就五種增進之法所謂值佛出世

為增進法得近善友為增進法得具無難為增進法

隨所修進一切善法永不失壞為增進法於彼安住

律儀菩薩摩訶薩所隨從修學為增進法舍利子是

爲菩薩摩訶薩修行毗梨耶波羅蜜多故成就五法
增進不退速悟無上正等菩提爾時長老舍利子白
佛言世尊頗有菩薩於是五法而損減不佛言有曰
何謂也大德薄伽梵何者是也大德蘇揭多佛告舍
利子有五種法菩薩成就便能損減何等爲五謂於
佛世而不值遇於彼善友不懷親近具無難法而不
獲得修習善法多有失壞於諸安住律儀菩薩心無
隨學由具如是損減法故亦不速悟無上菩提舍利
子何等五法菩薩成就舍利子在家菩薩爲王師傅
以威勢力恐怖衆生致有緣務祈請威福若爲成辦

如是事者重相酬謝而是菩薩觀世利故心無正直
便爲作之凡所出言無非爲利舍利子由如是法損
減善道由如是法損減無難如是在家菩薩爲養身
故行諸惡行不值佛世乃至不疾證於阿耨多羅三
藐三菩提舍利子是各菩薩成就第一損減之法復
次舍利子在家菩薩住毀城法何等名爲住毀城法
舍利子若諸如來應正等覺出現世間爲諸天人魔
梵說法開示宣暢初中後善文義巧妙純一圓滿清
白梵行爾時當有四衆出現所謂苾芻苾芻尼鄔波
索迦鄔波斯迦時苾芻尼依附村城郊野館舍國邑

90 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 22

王都為護戒故在中居止彼諸在家菩薩來是住處
汗其戒眾以毀戒故名住毀城犯是事已不值佛世
乃至不能疾悟無上菩提舍利子是名菩薩成就第
二損滅之法復次舍利子在家菩薩見諸有依善說
法律演正法時便於父母兄弟姊妹妻妾男女眷屬
及諸眾生而為法障舍利子在家菩薩障礙法已於
長夜中自於法律常多障礙不值佛世乃至不能疾
悟無上菩提舍利子是名菩薩成就第三損滅之法
復次舍利子在家菩薩聞佛經中如來讚說少欲知
足出要相應獨靜山林離苦之法心生不信輕毀誹

謗亦教他人起如是見是諸在家不善菩薩毀咎如
來清淨教已還復沉溺可毀咎趣何等名為可毀咎
趣謂墮地獄畜生焰魔世界或生邊地及蔑戾車惡
邪見中在家菩薩行是事故不值佛世乃至不悟無
上菩提舍利子是名菩薩成就第四損滅之法復次
舍利子在家菩薩依止國王及諸大臣乃至富貴有
自在者行弊惡行恃為勢力譏訶毀罵輕懷戲弄無
量眾生舍利子在家菩薩以成就此語惡行故速能
招集諸惡趣報不值佛世不遇善友不得無難失壞
善根不隨安住律儀菩薩修學正法不能速悟無上

菩提舍利子是名菩薩成就第五損減之法爾時世
尊欲重宣此義而說頌曰

菩薩成就五種法

如是智慧無增長

既不速疾見如來

亦不逢事人中上

或爲王者大師傅

欺詐誑惑諸衆生

由具如斯不善業

不遇世間依怙者

令多有情生怖畏

若納賊賂若損害

興造如斯惡業已

終不奉值人中尊

或令諸尼淨戒聚

破壞摧滅生悲苦

當離無量億如來

叵得成就諸無難

於其父母妻子等

障礙不令修法行

又障聽聞於正法

速感愚癡覆蔽果

若人厭世樂出家

便致拘執緣留礙

當離無量最勝尊

叵得成就諸無難

若有聽聞如是法

所謂讚說住空閑

便生不忍忿恚心

誦毀謂爲非法說

誦毀如是正法已

常住生盲大劇苦

一切重障罪業中

方斯十六不及一

彼難奉見諸如來

設見不能懷信敬

受女黃門生盲身

又受駝驢猪狗等

若有於佛及菩薩

深生殷重愛敬心

遠離一切障礙已

相續修行賢聖道

父母妻子眷屬等

恒樂安勤正法中

衆生厭世求出家

讚美勸助令其果

若處眷屬正法中

當速往登賢善趣

有能讚勸出家者

速悟無上佛菩提

復次舍利子出家菩薩復有五法若成就者不值佛世不親善友不具無難失壞善根不隨安住律儀菩薩修學正法亦不速悟無上菩提舍利子何等名爲出家菩薩成就五法一者毀犯尸羅二者誹謗正法

三者貪著名利四者堅執我見五者能於他家多生慳嫉舍利子如是名爲出家菩薩成就五法不值佛世乃至不獲無上正等菩提舍利子譬如餓狗惶惶緣路遇值鎖骨久無肉膩但見赤塗言是厚味便就啣之至多人處四衢道中以貪味故涎流骨上妄謂甜美或齧或舐或齧或吮歡愛纏附初無捨離時有刹帝利婆羅門及諸長者皆大富貴來遊此路時此餓狗遙見彼來心生熱惱作如是念彼來人者將無奪我所重美味便於是人發大瞋恚出深毒聲惡眼邪視露現齒牙便行齧害舍利子於意云何彼來人

01 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 22

者應為餘事豈復求此無肉赤塗之骨鎖耶舍利子
白佛言世尊不也世尊不也善逝佛告舍利子若如
是者彼慳餓狗以何等故出深毒聲現牙而吠舍利
子言如我意解恐彼來人貪著美膳必能奪我甘露
良味由如是意現牙吠耳佛告舍利子如是如是如
汝所言當來末世有諸苾芻於他施主勤習家慳耽
著屎尿妄加纏裹雖值如是具足無難而便委棄不
修正檢此之苾芻我說其行如前癡狗舍利子我今
出世憐愍眾生欲止息故專思此事為如是等諸惡
苾芻說此譬喻復次舍利子是諸菩薩摩訶薩為欲

利益安樂無量眾生故求於佛智行毗梨耶波羅蜜
多彼諸菩薩摩訶薩於己身肉尚行惠施況復規求
妄想惡肉而於他家起諸慳嫉舍利子彼諸苾芻慳
他家故我說是人為癡丈夫為活命者為守財穀奴
僕隸者為重世財寶玩縛者唯於衣食所欽尚者為
求妄想貪嗜惡肉起慳嫉者舍利子我今更說如是
正法彼諸苾芻先至他家不應見餘苾芻而生嫉妬
若有苾芻違我法教見餘苾芻或作是言此施主家
先為我識汝從何來乃至此耶我於此家極為親密
調諛交頤汝從何來輒相侵奪舍利子以何等故彼

慳苾芻於後來者偏生嫉妬舍利子由諸施家許其
衣鉢飲食臥具病緣醫藥及供身等資生什物彼作
是念恐彼施主將先許物施後來者由如是故卽此
苾芻於施主家起三重過一者起住處過見餘苾芻
或起恨言我於今者當離此處二者凡所習近當言
未知應與不應三者於不定家妄起諸過舍利子彼
慳苾芻於後來人發三惡言一者說住處過以諸惡
事增益其家今後苾芻心不樂住二者於後苾芻所
有實言反爲虛說三者詐現善相諂附是人伺有微
隙對衆治舉舍利子如是苾芻於他施家生慳嫉者
速滅一切所有白法永盡無遺復次舍利子若有苾
芻住家慳者我說是人爲不善者則爲棄捨菩提資
糧又爲不能隨逐安住律儀菩薩修正法者又舍利
子如是種相我更當說乃往昔時過於無數廣大無
量不可思議阿僧企耶劫有佛出世名勝現王如來
應正等覺明行圓滿善逝世間解無上丈夫調御士
天人師佛薄伽梵彼佛住壽九十拘胝歲聲聞衆會
九十拘胝那庾多皆是大阿羅漢諸漏已盡乃至一
切得心自在第一究竟舍利子當於爾時有大長者
名爲善擇其家巨富多饒財寶資產僮僕無不充徧

有二子一名律儀二名住律儀年在幼稚容貌端正
淨色圓滿衆人喜見舍利子時勝現王如來應正等
覺於晨朝時服衣持鉢大苾芻僧左右翼從彼佛世
尊居僧上首爲福利故現乞食法入彼長者所住大
城威儀庠序諸根寂定心意恬怕逮得調順奢摩他
及獲第一調順奢摩他修攝諸根如大龍象澄靜無
濁如深泉池盛德巍巍如金樓觀色相超挺如紫金
山又如大海衆寶充盈如帝釋王諸天圍遶如大梵
王心慮寂靜舍利子彼薄伽梵有如是等威相莊嚴
長者二子當於爾時在重閣上遙覩勝現王佛從遠
而來容貌威嚴色像第一發歡喜心歎未曾有舍利
子彼住律儀童子以先覩佛喜踊內心白其兄曰從
生已來兄頗曾見如是端嚴含靈王不兄報弟曰我
從生來實未曾見如是端嚴含靈中王弟白兄言如
我惟忖於未來世定當作是含靈中王舍利子爾時
住律儀童子卽爲其兄而說頌曰

如律儀兄今所見

我於當來定如是

大苾芻衆所圍遶

當復倍勝於今日

求菩提道因緣故

當誓不噉諸飲食

兄旣樂居牢獄中

我意決定當超勝

如是一切衆生尊

譬等衆星之滿月

誰有見斯不生信

而樂居家不出離

舍利子爾時律儀童子卽以伽陀報其弟曰

弟當且止勿高聲

非但語言便遂事

我豈當發世語言

試誰在先成正覺

舍利子爾時住律儀童子復以伽陀白其兄曰

如是無上菩提道

非但弊鄙慳心證

我當發大賢善聲

決定成佛人中上

夫懷慳者相如是

資產不欲令他知

我今豈復守沉默

尚捨身命況財寶

我以家資咸布施

爲求菩提道因緣

及以兄分家財寶

盡施佛田深敬故

誰見如是最勝尊

具三十二妙相者

而不發願趣菩提

唯除具諸下劣見

所有家宅及財寶

父母并諸眷屬等

我當一切皆捨離

速往善逝如來所

爲世依怙作光明

照世慈尊極難遇

百千拘胝那庾劫

如是勝相甚難聞

我見世尊入王都

大苾芻僧所圍遶

如盛滿月在清天

流光洞照諸依地

我見世尊遊四衢

周徧莊嚴於一切

猶彼具足千光日

獨滿虛空常徧照

我見世尊居衆首

莊嚴顯發苾芻僧

如彼蘇迷盧山王

映諸寶山悉嚴麗

如來威光極熾盛

通照此上諸羣生

圓成妙相兩足尊

榮光瑩飾諸大衆

如來住大神通力

善御天龍非人等

復興無量種變現

爲衆生故人王都

誰見如斯正法主

三十二相大莊嚴

而復希趣下劣乘

唯除不肖愚闇者

我今欣覩人中尊

發生難得清淨信

爲利舍識趣菩提

要當往覲如來所

舍利子爾時律儀童子又以伽陀報其弟曰

我於途路非懈怠

而不速往如來所

待我下斯重閣已

當出外宇諦思惟

宜應捐捨於我想

又不顧惜吾身命

及求最上丈夫智

爾乃往詣如來所

父母家宅及財寶

於如是等生重愛

我今一時皆棄捨

爾乃往詣如來所

若有欲願當成佛

又深愛樂如來者

宜速捐諸珍寶聚

捨離家法趣非家

舍利子爾時住律儀童子聞是語已卽於閣上下其階道將往勝現王如來應正等覺所未至之頃其兄律儀又從重閣速疾而下馳詣佛所修敬已訖時住律儀後乃方至爾時律儀兄童子卽以十億無價寶衣奉獻如來又於佛前而說頌曰

我今不求於妙相

奉施如來無價衣

惟願當來所獲報

如今世尊等無異

一切含靈中最勝

一切妙法善安住

惟願當來所獲報

如今世尊等無異

具足無上智慧藏

諸力正勤善安住

三十二相身所持

願速當成人中上

成就諸佛十種力

四無所畏善安住

惟願當來所獲報

如今世尊等無異

如佛所知真淨法

唯佛善住皆明照

願賜演通如是法

令我速悟上菩提

我今不求妙色相

奉佛無價勝上衣

唯希寂靜妙菩提

爲利諸天世間故

如來所住微妙法

一切異論無傾動

我今爲求如是法

敢施無價勝上衣

諸法無生無老病
亦無憂愁悲歎等
願爲開斯寂靜法
導利諸天世間故
若法無有貪瞋癡
亦無諸慢及渴愛
願說菩提與佛性
無爲清涼甘露法
若法如來所安住
爲天龍等深敬禮
或有思慮或無思
願爲開斯寂靜法
佛住是處能通照
無量四方諸佛土
如發大焰深暗中
願證如斯等甘露
若諸一切愛無愛
性常不依於欲界
色無色界亦無依
願說如斯勝妙法

舍利子爾時住律儀童子聞兄律儀說是頌已便以一具新妙寶屐奉施勝現王如來卽於佛前說伽陀

曰
願我當爲諸羣生
爲救爲趣爲依舍
更不履踐於邪徑
恒導羣迷說正路
願常不習於貪欲
此乃愚夫之所行
永離一切有爲法
恒值如來出興世
旣逢明照世間者
便應供養兩足尊
勤求無上佛菩提
爲利一切羣生故
當以無量香華鬘
高妙幢幡諸寶蓋

奉獻龍中之大龍
復以種種上衣服
俱持奉獻佛世尊
擊大小鼓吹螺貝
俱持奉獻照世尊
厚味種種極淳濃
俱持奉獻救世尊
廣行如是供養已
我於爾時便出家
當安住斯八妙道
爲利一切羣生故
卧具飲食諸醫藥
爲利一切羣生故
及奏簫管清歌等
爲利一切羣生故
世間微妙所珍尚
爲利一切羣生故
利益無量諸羣生
精勵勤修於梵行
復安無量億衆生

願我爲諸有識依
衆聖訶毀極下劣
又當棄捐諸放逸
願我永不生衆難
生生常見人中尊
旣生信已修恭敬
種種音樂供養已
如是廣修諸供養
永斷欲法捨居家
常不履於邪曲徑
所謂姪欲我能捐
於不放逸恒修學
常得生諸淨信家
見已於佛生深信
以妙華鬘及塗香
爲求諸佛深智慧
乃經無量拘胝劫
精勤奉修清淨行
舍利子爾時住律儀童子說是頌已卽於所讚勝現

王如來之處爲彼如來以赤栴檀建立道場高華綺飾四踰繕那縱廣莊嚴備諸彫麗爾時童子既立道場莊嚴成就卽以奉施彼佛世尊又於佛前而說頌曰

佛所安住四種住 往昔最勝所稱譽

我今欣求如是住 惟願善逝慈哀許

若有安住是所住 心常了知無量衆

及知過去未來生 我今欣求如是住

若住是住至究竟 四種正勝四神足

及四最勝無礙辯 我今欣求如是住

舍利子爾時薄伽梵勝現王如來哀此童子受其所獻上勝道場與苾芻僧入中居止時彼童子既觀如來及苾芻僧受其施故心大歡喜踊躍無量又以種種上妙供具而爲供養倍加恭敬尊重讚歎於半月間中無斷絕過是已後便於佛前除去鬚髮被袈裟衣以淨信心捨棄家法起於非家專志精勤求諸善法舍利子時二童子求善法已心正了知於佛菩提俱發弘誓其兄律儀作是誓言願我最先成等正覺其佛名曰世間依怙放大光明其弟住律儀者又發誓言願我最先成等正覺其佛名曰大導師王天人

中尊舍利子爾時律儀童子菩薩摩訶薩作是願已
卽於勝現王如來前合掌而立大誓莊嚴說伽陀曰
我當不復更安坐 亦無放倚身眠臥
專精勤求菩提道 爲利一切羣生故
我當不觀身與命 常捨懶惰勤精進
志求上妙菩提道 爲利一切羣生故
假使血肉都乾竭 皮骨筋脉皆枯燥
要捨懈怠及身命 精勤爲趣上菩提
舍利子爾時住律儀童子菩薩摩訶薩聞兄律儀童
子菩薩摩訶薩發是願已歡喜踊躍卽於其前說伽

陀曰

今當共契同和好 修行無上菩提行
興發最勝勤精進 爲利一切羣生故
我今薄濟於身命 隨彼血肉皆枯燥
發千精進隨兄學 爲求無上菩提故
我當獨處住空閑 山野林中勤精進
常求微妙最勝智 隨住莊嚴大法王
爾時佛告舍利子彼過去世勝現王如來法中律儀
童子菩薩摩訶薩與住律儀童子菩薩摩訶薩於彼
佛所發大弘誓行毗梨耶波羅蜜多故精勤不懈修

90 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 22

經

大智度論卷四十一

十一

鳥

行正道舍利子彼二菩薩行精進時於千歲中乃至
 未曾如彈指頃被於睡眠之所逼奪於千歲中未曾
 起念欲臥息心於千歲中未曾起念欲樂坐心於千
 歲中未曾一返屈身蹲踞除便利若食飲時便就
 住立於千歲中未曾再食日止一食食止一搏飲水
 一器於千歲中未曾起念欣樂食心如謂我今極爲
 饑渴願當疾得如是等念初無有生於千歲中未曾
 一返過量飲噉於千歲中未曾起念稱量飲食此鹹
 此淡此甘此苦辛酢美惡初無興慮於千歲中每乞
 食時一心正念未曾觀彼授食人面不生是念誰與

我食爲丈夫耶爲婦人耶乃至童男童女皆不瞻視
 於千歲中居止樹下未曾仰面觀於樹相於千歲中
 所著衣服未曾再易於千歲中未曾一念起於欲覺
 悲覺害覺於千歲中未曾起念緣親里覺若父若母
 兄弟姊妹及餘眷屬皆不緣念於千歲中未曾起念
 於所居家發思覺心於千歲中未曾起念仰觀虛空
 日月星宿雲霞等色於千歲中未曾起念以身依倚
 若壁若樹於千歲中未曾起念以諸酥油用塗肢體
 於千歲中未曾起念身心驚怖於千歲中未曾起念
 身心疲倦於千歲中未曾起念懈怠懶惰放逸之心

經

大智度論卷四十一

十一

鳥

唯興是念我今修行阿耨多羅三藐三菩提何時當
證何時當得於千歲中未曾一返身心痛惱於千歲
中未曾起念我欲剃髮唯除四天大王時來頭上以
其神力手摩持去於彼天宮起窰堵波衆寶莊嚴而
爲供養於千歲中雖有天王若來若去而心都無去
來之想於千歲中未曾起念從陰影處至光景處從
炎熱處至清涼處於千歲中於嚴寒時未曾起念覆
厚煖衣而取溫適於千歲中未曾起念論說世間無
益之語舍利子是二菩薩於千歲中行如是等堅固
精進時有惡魔名愚癡念如我今者出現世間有惡

魔羅愚癡念者舍利子彼時惡魔興壞亂故於律儀
菩薩所經行道仰布利刀徧其行處爾時律儀菩薩
於彼刀道微失本心生利刃想適生想已便卽追悔
發大音聲再返唱言咄哉竒事我今如何住於放逸
舍利子時彼菩薩所發音聲徧告三千大千世界於
上空中有百千拘胝天魔徒黨聞是菩薩憶念音聲
卽共同時語菩薩言如汝今者普告之聲深爲善說
深爲善說舍利子如是天聲唯律儀聞彼住律儀於
諸天聲及此菩薩普告大聲初不聞之爾時律儀菩
薩聞天語已奮發堅固大精進欲復前經行再轉其

心不緣刀刃舍利子時彼菩薩摩訶薩降魔怨已住
如是威儀行如是妙行修如是道迹起如是大悲興
發如是勇猛精進未曾休廢復次舍利子彼二大士
於彼法中行毗梨耶波羅蜜多故俱成就是威儀行
迹大悲勇猛又於千歲住空閑林修佛隨念過是已
後勝現王如來方入涅槃爾時諸天便來告曰善男
子豈不知耶如來今者已般涅槃時二大士既聞天
告卽便往詣勝現王如來涅槃林所既到彼已合掌
而立瞻仰如來目未曾捨極懷戀慕深生敬重作是
念言如來出世大慈悲者覆護衆生同於舍宅如何

一旦速般涅槃令我等類無依無怙舍利子是二大
士立如來前深懷戀仰七日七夜足不移處不勝哀
感遂立命終往生梵世既受梵身得宿智力以大神
通從上來下至涅槃會爲勝現王如來應正等覺所
有舍利起窣堵波珍寶妙物極世莊嚴四十千歲方
得成就以諸輪蓋安施其上舍利子時二菩薩爲彼
如來起窣堵波已心大歡喜合掌而立觀其福相倍
加欣慶如是又經七十千歲方始致禮因爾命終俱
生瞻部洲中大轉輪王家處太后胎舍利子彼初生
已便憶過去所經諸事作如是言我於今者應當安

住最上第一不放逸法復以伽陀而自誦曰

我今生處輪王家 廣大財食皆如意

於極放逸當捐捨 勤求無上佛菩提

財寶色欲及王位 無常迅速須更頃

智者於斯不欣樂 勤求上妙佛菩提

若於財寶不生樂 爲利含識證菩提

應疾捨欲求出家 修行勝妙諸梵行

我昔過去無量劫 耽滯五欲爲功德

若生天上及人中 未曾於彼生知厭

故應捨欲及王位 父母眷屬諸財寶

及捨國城大軍衆 出家勤求證菩提

舍利子時彼菩薩身相端正如十六少童不樂俗網
常思過患卽剃鬚髮服袈裟衣以清淨信棄捨家法
趣於非家二十歲勤修梵行後命終已復生梵世
於彼壽盡還生瞻部舍利子當於爾時此瞻部洲有
佛出世名曰妙香如來應正等覺明行圓滿善逝世
間解無上丈夫善調御士天人師佛薄伽梵時彼菩
薩旣遇佛已卽於法中剃除鬚髮服袈裟衣以清淨
信棄捨家法趣於非家滿拘胝歲修行梵行如是次
第十千如來出現於世律儀菩薩皆得值遇於諸佛

所植衆德本常勤精進修行梵行彼住律儀菩薩常
與其兄同生一處修諸聖道唯於一佛不修梵行以
是因故律儀菩薩先得成佛出現於世名曰熾然精
進如來應正等覺明行圓滿善遊世間解無上丈夫
調御士天人師佛薄伽梵住世教化經九十拘胝歲
聲聞大衆有九十那由多共會說法舍利子熾然精
進如來興世之時彼住律儀菩薩爲轉輪王威加四
域福德所被於熾然精進如來極起深信以種種上
妙衣服餽膳飲食病緣醫藥什物衆具供養恭敬尊
重讚歎於三月中奉獻彼佛及苾芻僧舍利子爾時
熾然精進如來應等正覺雖愛供養爲欲覺悟彼輪
王故令其憶念說伽陀曰

若爲證得諸佛法

勇猛精進最爲上

貪著五欲諸舍生

凡有所求難果遂

若求義利於五欲

智者當知無義利

汝今處在無義中

求勝義利不可得

我昔與汝爲兄弟

俱發弘誓趣菩提

爾時競列至誠言

誰速在初成正覺

今汝見我證菩提

轉勝梵輪於大衆

汝猶沉溺五欲家

姪荒女色恒守護

過去諸佛常宣說

智者不應保弊欲

是故我恒勤遠離

曾未追求行放逸

汝攝惡慧行無義

汝常安住無義業

欲法引苦汝長迷

離欲清淨聖所讚

舍利子時彼輪王聞熾然精進如來說伽陀已生大覺悟深見欲過希求出家竟不辭諸妻子眷屬長者僚宰大小諸王亦不顧戀國邑人民財寶府藏即從座起往如來前一心合掌說伽陀曰

我當悉捨於家國

要往空閑至命終

寧使肌肉並乾枯

為佛菩提因緣故

復當勇猛大精進

利益無量諸羣生

棄捨家法趣非家

當住虛靜無為處

不欣緣附於五欲

弊惡誑惑彼愚夫

由我陷沒欲泥中

故使掩面而隨後

諸欲財寶及王位

一切一時皆棄捨

即於如來聖教中

專務精修無上道

誰有智者當親附

誰行學藏有為行

令我修行精進已

不速成佛躋諸欲

是故我捨諸欲樂

王位財寶皆除斷

要歸佛教趣非家

為佛菩提因緣故

舍利子爾時輪王說伽陀已卽於熾然精進佛所剃除鬚髮服袈裟衣以淨信心棄捨家法趣非家道往空靜處勤修梵行於時復有六十拘胝百千衆生聞彼輪王出家學道亦懷淨信除捨俗相隨王出家修諸梵行舍利子時熾然精進如來處世垂化久乃涅槃輪王苾芻見佛滅度悲感充塞奉接如來遺身舍利起窣堵波嚴飾供養其後不久便致命終生觀史多天受天報盡還生瞻部洲中卽於是劫成阿耨多羅三藐三菩提名曰妙行如來應正等覺明行圓滿善逝世間解無上丈夫調御士天人師佛薄伽梵其

佛住世滿拘胝歲聲聞弟子有拘胝那庾多而共集會皆是大阿羅漢諸漏已盡乃至一切心得自在已到究竟第一彼岸妙行如來安住百千菩薩摩訶薩令於阿耨多羅三藐三菩提不復退轉又爲無量無數諸衆生等宣揚妙法所應作已入般涅槃正法住世經餘一劫流布舍利饒益衆生亦如我今般涅槃後舍利廣流等無有異爾時佛告舍利子諸菩薩摩訶薩行毗梨耶波羅蜜多故安住正勤行菩薩道應當依隨律儀菩薩摩訶薩修學勇猛無倦精進波羅蜜多不應依附彼枯骨鎖住慳衆生而爲修學舍利

子若有菩薩樂求菩提不應他家而生慳吝若復失念起慳吝時應樂觀察三種怖畏何等爲三謂於他家數致來往或因乞食或復談話纏綿不已遂成親好見彼第二賢善必芻以貪著故便生慳嫉或時微起一念恚心不相隨順由是緣故當知攝受地獄諸苦業道當知下生盲種於其心田當知生邊地業具足攝受舍利子我今爲汝更說其相謂彼菩薩見諸賢善清淨芻芻來至其所輒生嫉妬瞋恚之心內雖忿結而外現清白與交言論心乃慳吝而身恒將遇隨事供擬或私處隱屏怒眼視之或以不實事用加

誣謗舍利子以是因緣如是菩薩當知攝受地獄業道生盲種子植其中心雖生人道復在邊地遭諸苦楚受生盲報多被誹謗爲他役使晝夜辛勤初無停息舍利子若諸菩薩說於他家起慳嫉時應思惟此三種怖畏爾時如來說是語已長老舍利子白佛言甚奇世尊未曾有也是諸菩薩摩訶薩極爲希有乃能善遇如來說是家慳出要之法善哉世尊願爲我等諸聲聞衆說正法要離家慳相所以者何我等於佛法中非爲不願脫於地獄生盲邊地誹謗果報常願生於中國人趣我等聲聞深欲樂聞離家慳法惟

願世尊捨無緣怨不捨我等必爲宣說爾時佛告舍利子善哉善哉舍利子甚爲希有汝等乃能住無浮諂請問如來如是之義諦聽諦聽當爲汝說舍利子若有衆生欲隨如來修學佛法我當爲彼如應顯說何以故以諸衆生能隨佛學如來不違彼意必現其前而爲說故又舍利子若有衆生不樂隨佛修學正法若爲彼說是人聞已則當成立鬪諍根本舍利子如是成就淨信菩薩摩訶薩行毗梨耶波羅蜜多故於諸佛法廣生淨信長久大夜常樂觀察爲欲救濟沉溺衆生故往如來所殷勤鄭重諮疑問義凡所敷

演樂欲聽聞旣聞法已復獲廣大清淨深信歡喜踊躍倍加精進受持正法如說修行又舍利子當來之世我諸弟子少有苾芻深心希樂趣般涅槃寂靜之法多依三事以爲常業何等爲三一者常喜追求世間名利二者貪樂朋黨追求食家往還不絕三者喜樂追求華飾房宇貯積財富什物資具是名依止追求三事舍利子是諸苾芻以依如是三種事故終不解脫三種惡趣舍利子如是苾芻不樂解脫地獄傍生焰魔鬼趣而返喜樂勤修滅盡趣天道法又常勤修相言鬪訟譏刺離間諍論之事復樂攝受心不淨

信諸惡友等捨空靜林依泊村落白衣俗人而爲朋黨舍利子諸在家者作如是言如是長老數來我家與我同好我當供給施其衣服飲食臥具病緣醫藥諸餘資具彼住空閑諸長老等旣於俗人素無周接我等如何與之言問以此事故是諸苾芻與在家者轉相親狎更互談說但敘世事繁雜戲論舍利子是惡苾芻樂共無良之人同止遊涉久著住處曾無移轉多覓朋黨及多食家數數瞻視躬行慶弔由此事故密懷親愛設有客苾芻來都無供給先行毀訾非法之言而客苾芻實是賢聖是惡苾芻亦不稱說汝

爲多聞具戒清淨汝是預流一來不還阿羅漢果如是等言全不稱說舍利子是惡苾芻在我法中不修我法更無餘事惟樂毀訾訶罵不息舍利子彼諸俗人爲朋黨者又作是言諸客苾芻未曾與我共住久處周旋還往舊住苾芻與我久住情事相委通致使命經理緣務以是義故我當與諸舊住苾芻共相護愒假爲威勢舍利子以是等故諸惡苾芻於是經典若解不解一切時中皆悉誹謗毀訾不信又舍利子若復有人聽聞如來所說經典如是文句差別法門常樂聽聞便信解無疑惑者必能捨離如是衆生

及捨應往惡趣之業如是舍利子修行無倦精進菩薩摩訶薩聽聞如是慳嫉等相往惡趣業既聞是已便不自行家慳等事況復爲他開示此法舍利子如是名爲菩薩摩訶薩精勤無倦修行毗梨耶波羅蜜多應如是學

大寶積經卷第四十七

校謄

第六紙

二行規南
藏作現

音釋

菝戾車

梵語也亦云彌離車此云譏訶譏居依切惡見菝彌剌切戾力霽切

大切賁何賊賊

賊則郎切吏受賄也又盜所取物曰賊

五巧切以

舌取食也

善切戲

若戲切孔隙也

毗結

徒預切拔也

復尊切

踰居御切

羅切

温乃管切

青浦居士諸從禮施贊刻此
大寶積經第四十七卷 恩江沙彌可震對
長洲徐普書 進賢洪以仁刻
萬曆乙未孟秋徑山與聖萬壽禪寺識

法清涼微妙膏藥用塗傳故一切衆生貪瞋癡等諸
熱惱病皆悉除滅舍利子諸菩薩摩訶薩以是正法
良藥塗傳衆生令三毒滅故是菩薩摩訶薩無倦正
勤修行毗梨耶波羅蜜多應如是學復次舍利子菩
薩摩訶薩修行毗梨耶波羅蜜多其相無量我今當
說舍利子菩薩摩訶薩常作是念所謂一切衆生皆
是病者何以故由爲三毒常熱惱故若有衆生生地
獄者亦爲如是貪瞋癡等之所燒惱如是生飭生者
焰魔世界中天上所有衆生無不爲是三毒燒惱
若有衆生成疑見等諸煩惱者亦常爲於貪瞋癡等

之所燒惱舍利子是諸衆生具煩惱病非餘良醫及
勝妙藥若塗若傳能令貪瞋癡等熱惱靜息惟除如
來無上勝妙大法醫王及證法身菩薩摩訶薩以大
願力自嚴持身爲良藥已乃能除滅一切衆生貪瞋
癡等諸熱惱病復次舍利子汝能解了如是法門所
謂一切衆生貪瞋癡病非餘醫藥而能瘥愈惟有如
來無上醫王法身菩薩以大願力而得除滅舍利子
於汝意云何衆生界多地等界多舍利子白佛言世
尊如我解佛所說妙義衆生界多非大地界亦非水
界火界風界所能比類佛言如是如是如汝所說衆

生界多非大地界乃至衆生界多非彼風界舍利子
我今更說如是之相舍利子有諸衆生身形微細難
可覩見非佛法外諸神仙眼之所能及亦非聲聞獨
覺天眼境界惟是如來清淨天眼所能照了舍利子
如來以淨天眼明見如車輪量所有微細含識衆生
其數無量多於三千大千世界於人天趣諸受生者
舍利子如是無量無邊諸有情界乃至三千大千世
界一切有情若卵生若胎生若濕生若化生若有色
若無色若有想若無想若非有想非無想若可見若
不可見如是乃至所有假名建立諸有情界設使於

一刹那或一羅婆或一牟呼多頃非前非後皆得人
身彼諸人等並成良醫壽命一劫明練方術通開醫
道爲大醫師善療衆病皆如今者時縛迦醫王舍利
子彼諸醫王同共集議作如是言有一衆生懷貪瞋
癡熱惱之病我爲醫王勤加功用當爲除滅如是舍
利子設使彼等一一諸醫皆持清涼妙藥其量高廣
如蘇迷盧山王並又勤加功用將欲滅一衆生貪瞋
癡惱又彼諸醫於是清涼藥分山王摩以爲未盡其
劫壽塗一衆生一切醫王盡其功術並悉疲倦乃至
藥分山王用末塗盡皆亦不能滅一衆生貪瞋癡等

諸惱熱病復次舍利子諸佛如來出興于世見諸衆生具煩惱病如來但說一不淨觀無上正法阿竭陀膏藥用以塗傅無量衆生貪欲熱惱無不除滅如是塗傅無量百衆生無量千衆生無量百千衆生無量拘胝衆生無量百拘胝無量千拘胝無量百千拘胝衆生無量拘胝那庾多衆生無量百拘胝那庾多無量千拘胝那庾多無量百千拘胝那庾多衆生如是無量薑羯羅衆生無量頻跋羅衆生乃至無量不可說不可說衆生以聞一不淨觀故貪欲熱惱同時靜息舍利子如來但說一慈悲觀無上正法清涼妙藥

用以塗傅無量衆生瞋恚熱惱皆得除滅乃至不可說不可說衆生瞋恚除滅亦復如是舍利子如來但說一因緣觀無上正法清涼妙藥用以塗傅無量衆生愚癡熱惱皆得止息乃至不可說不可說衆生愚癡止息亦復如是又舍利子證得法身菩薩摩訶薩亦以大願自嚴持身爲法良藥善能息滅無量衆生三毒熱惱乃至息滅不可說不可說無量衆生貪瞋癡等諸惱熱病復次舍利子如我先說證得成就法身菩薩摩訶薩願力持身而爲良藥用滅無量不可說衆生煩惱熱病如是等相吾今更說汝當諦聽舍

利子我念往昔過無數劫有佛興世名曰然燈如來
應正等覺明行圓滿善逝世間解無上丈夫調御士
天人師佛薄伽梵舍利子爾時然燈如來應正等覺
爲我授記作如是言汝摩納婆於當來世過阿僧企
耶劫當得作佛號釋迦牟尼如來應正等覺乃至佛
薄伽梵舍利子彼然燈佛授我記已爾時便證法身
成就佛滅度後我爲帝釋名微妙眼於三十三天得
大自在具大神通有大威德宗族熾盛舍利子是時
瞻部洲中有八萬四千大城有無量千村邑聚落市
肆居止復有無量百千拘胝那度多一切衆生住如
是處人物繁擁極爲興盛舍利子當於爾時有大疫
病中劫出現多有衆生遭遇重病身體潰爛癰腫瘰
癧疥癬惡瘡風熱痰癩互相違返以要言之一切病
苦無不畢集於時復有無量百千諸醫藥師爲欲救
療如是病苦勤加功用極致疲倦而衆生病無有愈
者舍利子彼諸無量病苦衆生不遇良醫爲病所弊
無有救護無有歸趣皆共呼嗟失聲號哭涕泣橫流
作如是言我今受此無量重病何處當有天龍藥叉
健達縛及諸羅刹人非人等以大慈悲而能見爲除
我病者若有能除我病苦者我當不恪一切財寶厚

報其恩隨其教誨舍利子我於爾時以淨天眼超過
於人見諸衆生種種疫病逼惱其身煩冤纏繞無有
救濟又以天耳清淨過人徹聽衆生號訴之聲極爲
悲怨酸楚難聞舍利子我於彼時見聞是已於是衆
生深起大悲卽作是念一何苦哉如是無量無邊衆
生遭是重病無舍無宅無救無護無歸依趣無能療
者我今決定爲諸衆生爲舍爲宅爲救爲護爲歸依
處爲醫療者必令病惱皆平復舍利子我於爾時
便隱帝釋高廣之形於瞻部洲俱盧大城不遠受化
生大衆生身名曰蘇摩旣受生已住虛空中以伽陀

頌徧告瞻部洲內所有衆生說其頌曰

俱盧大城爲不遠

有大身者名蘇摩

若有衆生噉其肉

一切病惱皆除愈

彼無瞋恚諸忿害

爲作良醫生瞻部

汝當欣踊勿驚疑

隨意割肉除衆惱

舍利子爾時瞻部洲內所有諸城八萬四千村落市
肆又無量千一切含識爲病惱者聞是聲已一時皆
往俱盧大城蘇摩菩薩大身之所競以利刀或割或
截彼之身肉舍利子蘇摩菩薩行精進行當被割時
於其身肉出大音聲說伽陀曰

若此能實證菩提

智藏當成無盡者

隨我所發諦誠言

亦願身肉常無盡

舍利子爾時瞻部洲內一切衆生爲病逼故段段割截菩薩之身或擔持去或就食者雖被加害以願力故隨割隨生無有缺減舍利子是諸衆生噉食蘇摩菩薩肉已一切病患悉皆除滅病旣除瘥復令衆生心得安樂形無變易是諸衆生身心安樂展轉聲告徧瞻部洲來食肉已病皆除愈無有變易身心安樂舍利子爾時一切瞻部洲中人民之類若男若女童男童女食菩薩肉病除愈者於是菩薩深懷恩惠競自思惟是蘇摩者極有重恩除我病苦施我安樂令無變易我當云何施設供養酬斯厚澤作是念已咸共集會詣俱盧大城蘇摩菩薩大身之所旣到彼已皆共圍繞感戴其恩不能自勝說伽陀曰

仁爲舍宅爲救護

仁爲良醫妙藥者

惟願哀憐垂教勅

我等如何修供養

舍利子我於爾時爲是大身拔濟衆生如是病苦知是無量諸衆生等銜我重恩歸依我已便滅所現蘇摩大身復帝釋形住衆生前威光顯盛而告之曰卿等當知若爲病苦由我身肉而得除差卿等懷恩將

思報者卿等當知我本不爲村城官邑王都國土田宅舍屋住處等事愍卿病苦行身肉施我亦不爲金銀末尼瑠璃貝珠珂貝璧玉珊瑚等寶行身肉施我亦不爲象馬牛羊放牧畜產行身肉施我亦不爲婦人丈夫童男童女奴婢僕使行身肉施我亦不爲餽膳飲食衣服臥具病緣醫藥及餘資穡行身肉施我亦不爲園林池苑宮殿樓觀愍卿病苦行身肉施卿等當知我本所以愍卿病苦行身肉施爲令衆生離不善業卿等但能爲我永斷永離殺生之業永斷永離不與取業永斷永離欲邪行業如是永斷永離虛誑語業離間語業麤惡語業綺飾語業貪欲瞋恚諸邪見業卿等於此永斷離者是爲利益是爲報恩舍利子爾時帝釋復爲大衆說伽陀曰

我非爲求珍寶聚

其量高廣等迷盧

亦不爲求天玉女

及諸衣食牀敷事

欲奉蘇摩大身者

但當尊重同和合

展轉慈心相敬視

專修淨妙十業道

卿等當於十業道

但常和合堅防守

是名大興法供養

菩薩非求世財故

我不用諸世財寶

芳羞飲食妙衣服

象馬車乘牛羊等

牀敷塚女資生具

卿等但共同和合

善持清淨十業道

展轉發起大慈心

彼此熏修利義意

舍利子爾時瞻部洲內無量衆人聞我說是勸發之
言感恩德故頂禮我足皆悉受持十種清淨妙善業
道舍利子我於爾時爲彼大衆廣宣正法示教讚喜
便隱天身不現於世如是舍利子我正憶念往昔世
時瞻部洲中所有人民食噉蘇摩菩薩肉者從是已
來乃至無有一人墮於惡趣彼命終已皆生三十三
天宿業力故與我俱生舍利子我於爾時復爲彼天

隨其所應敷演法化示教讚喜皆令安住聲聞衆中
或獨覺乘或有安住阿耨多羅一切智乘如是等衆
聞我法故或有已般涅槃正般涅槃當涅槃者舍利
子汝觀如是安住法身菩薩摩訶薩行毗梨耶波羅
蜜多故成就如是大神通力成就如是大威德力成
就如是大勢之力乃能但捨一身之惠而大成孰無
邊衆生皆住三乘得不退轉爾時長老舍利子白佛
言世尊云何菩薩摩訶薩行毗梨耶波羅蜜多時精
勤修獲法身之相唯然世尊願爲解說佛告舍利子
菩薩摩訶薩法身之相無生無死堅固難壞猶如金

剛不可思議而諸法身菩薩摩訶薩爲欲化度身壞
衆生故現壞身又欲化諸身不壞者現不壞身然此
法身圓成具足非火所燒非刀能割如彼金剛堅固
難壞舍利子安住法身菩薩摩訶薩行毗黎耶波羅
蜜多故無倦精進非有功用但以其身則能成熟無
量衆生不假其心思量分別卽此菩薩身自能知了
諸身相隨入自身真如法性自身真如隨入諸法真
如諸法真如隨入自身真如自身真如隨入諸佛真
如諸佛真如隨入自身真如自身真如隨入去來現
在真如去來現在真如隨入自身真如又過去真如

不違未來真如亦非未來真如違過去真如又過去
真如不違現在真如亦非現在真如違過去真如又
未來真如不違過去真如亦非過去真如違未來真
如又未來真如不違現在真如亦非現在真如違未
來真如又現在真如不違過去真如亦非過去真如
違現在真如又現在真如不違未來真如亦非未來
真如違現在真如又去來現在真如卽蘊界處真如
又蘊界處真如卽染污清淨真如又染污清淨真如
卽流轉寂滅真如又流轉寂滅真如卽加行真如又
加行真如卽一切行真如而一切行卽是真如而此

真如卽一切行復次舍利子夫真如者卽是實性卽是如性是非不如性是不遠離性是無發動性是無燒亂性是不相違性是無違諍性又舍利子夫真如者無所違諍以無違諍名曰真如然諸如來說名違諍舍利子真如說名隨順攝受何因緣故如來乃說以爲違諍舍利子如來達於一切諍故以是因緣菩薩常現一切違諍又諸如來本無違諍亦未曾起何以故無違無諍說名如來而常現諸色像違諍非惟如來而有動亂諸菩薩摩訶薩以如實智觀如來身於如來身平等法性卽觀自身平等法性又於自身平等法性觀察如來平等法性又於自身平等法性觀察諸身及以非身於一切身及以非身觀察於彼不思議身菩薩摩訶薩於緣生法了一切身旣了知已引攝法身舍利子菩薩摩訶薩當於引攝此法身時我說是等便證法身旣得證已又能示現蘊界處身當知是身法身所顯是故舍利子一切衆生若若有值遇如是法身若見若聞卽皆調伏觸彼身時能令衆生作諸義利復次舍利子如時縛迦大醫王者聚集衆藥和爲形相變成女像妍質華美淨色悅人由是醫王善能作故妙善成就善加嚴飾舍利子是藥

女像雖無思慮又無分別而能示現往來住止若坐若臥諸有豪貴大王王子大臣長者及諸小王有病惱者至時縛迦大醫王所爾時醫王觀其所治卽以藥女賜爲仇匹彼諸人等旣蒙所惠便執藥女暫身交觸一切患苦自然消除無病安樂無有變異舍利子此時縛迦大醫之王療治世間諸病妙智餘有世醫無與等者如是舍利子法身所顯菩薩摩訶薩亦復如是乃至一切衆生若男若女童男童女有貪恚癡熱惱病者至菩薩所暫觸其身一切病苦皆得消滅又覺其身離諸熱惱何以故由諸菩薩摩訶薩本

發大願善清淨故復次舍利子法身菩薩摩訶薩不由食搏食故身得安住雖復了知一切飲食本無所有愍衆生故而現受食雖現食之情無耽著於其自身未曾顧戀何以故法身之力無退無減不以飲食安住其身又舍利子法身菩薩摩訶薩於諸生死難可了知而示現身有生有死何以故爲欲成熟諸衆生故示現終盡然此菩薩摩訶薩了知諸法無有終盡示現有生了知諸法無有起作雖現生起了知諸法畢竟無生又此法身以法爲食法力所持依止於法本願力故無有功用成熟衆生舍利子法身菩薩

摩訶薩如是等相皆由無倦精進修行毗梨耶波羅
蜜多故而便證入爾時世尊欲重宣此義而說頌曰
身如金剛不可損 知時設化故現生
毒惡刀火非燒害 見燒害者所化衆
有病則見爲良藥 饑渴衆生見飲食
以諸法性無分別 法身無身一理證
了知一法從緣生 無摩納婆意生等
衆緣有故苦綸連 衆緣無故苦綸斷
了色不堅如聚沫 思惟諸受等浮泡
想如熱時陽焰動 芭蕉諸行應觀察

如世善幻舞戲者 刹那便現諸色像
了知識用亦如是 智者於彼皆無願
知世財如箭離弦 復似電飛山水暴
暫聚還散類空雲 智者於彼皆無願
諸有都無有衆生 未曾不受天諸樂
復墮地獄更貧苦 佛子觀已不求天
彼心無依似遊空 非有非無離依止
雖生諸有無生死 證無老死大我故
復次舍利子無倦精進菩薩摩訶薩修行毗梨耶波
羅蜜多時當應如是正心修學舍利子世間雖有諸

醫充滿世界不能了知三種大患何以故彼皆不善
又無智故而不能識貪瞋癡等三種大患舍利子彼
無智醫非惟不識三種大患又不了知三大良藥對
治三患何等爲三所謂不能了知貪欲大患不淨良
藥而爲對治瞋恚大患慈心良藥而爲對治愚癡大
患緣起良藥而爲對治舍利子如是諸醫惟能療治
一二別病不能普治一切衆病惟能暫治少時降損
非爲盡病畢竟除瘥菩薩摩訶薩作如是念我今行
毗梨耶波羅蜜多故修菩薩道豈當隨學如是諸醫
我當依隨諸佛世尊善達諸法無上大醫之王畢竟

療治一切病者是大醫王我今隨從依憑修學旣修
學已我應普治一切病苦豈當療治別別諸病我應
畢竟除衆病本豈當暫瘥不除病本舍利子是菩薩
摩訶薩復作是念我應積集如是無上正法阿竭陀
膏藥當使一切衆生聞藥聲已貪瞋癡等極重大患
自然消滅是故舍利子無倦精進菩薩摩訶薩行毗
梨耶波羅蜜多故積集如是無上正法阿竭陀膏藥
塗傳一切有病衆生不與聲聞獨覺法共惟除如來
無上大醫之王善達一切法者以無上正法阿竭陀
膏藥徧塗所吹大法之螺如是塗已便就吹之其聲

徧告三千大千世界於中所有非一衆生聞是聲已
但使一切貪瞋癡等諸大重病皆悉除滅如是除滅
非一百衆生非一千衆生非一百千衆生如是除滅
非一拘胝衆生非一百拘胝千拘胝百千拘胝衆生
如是除滅非一拘胝那庾多衆生非一百拘胝那庾
多千拘胝那庾多百千拘胝那庾多衆生非一薑羯
羅衆生如是除滅乃至不可說不可說衆生所有三
毒大患皆得除滅復次舍利子如大雪山中有大藥
王名爲毗伽摩若聞其聲一切世間猛烈毒熱皆悉
消滅若藥所住百踰繕那其威盛故令諸惡毒皆無

勢力若以藥王塗大螺鼓若擊若吹其聲所及諸有
衆生或飲毒藥或被毒螫毒塗毒刺衆毒惱者但聞
如是螺鼓之聲暫至於耳一切諸毒皆得除滅舍利
子如是毗伽摩大妙藥王一切世醫皆不能識唯除
時縛迦大醫王者方知色性如是舍利子無倦精進
菩薩摩訶薩亦復如是行毗梨耶波羅蜜多故積集
如是無上正法阿竭陀膏藥不與聲聞獨覺法共唯
除如來無上正法大醫之王能滅衆生諸有病者以
無上正法阿竭陀膏藥用塗大法之螺塗已吹之聲
告三千大千世界其中所有一切衆生乃至不可說

不可說等聞是聲已貪瞋癡等諸重大患悉得寂滅
無有遺餘復次舍利子如是無上正法阿竭陀膏藥
從於何所而來集此舍利子當知如是膏藥從大菩
提法器中來又舍利子彼菩提器從何而來當知從
菩薩法財寶篋中來又舍利子如是菩薩寶篋從何
而來當知不異大菩薩藏法門中來是故舍利子無
倦精進菩薩摩訶薩爲欲修行毗梨耶波羅蜜多故
應極至誠尋求如是大菩薩藏法門經典聽聞受持
若讀若誦研究義理廣爲衆生宣說開示舍利子汝
又應知如是之相吾今當說重顯其義若諸無倦精

進菩薩摩訶薩修行毗梨耶波羅蜜多故聞我說已
於是經典應極至誠尋究義理爲他開示舍利子乃
往古世過阿僧企耶劫廣大無量不可思議難可度
量乃至過是等數又復過是等量當於爾時於此世
界有佛出現名赤蓮華勝如來應正等覺明行圓滿
善逝世間解無上丈夫調御士天人師佛薄伽梵舍
利子彼佛聲聞弟子一大集會其數具滿八十拘胝
皆是大阿羅漢諸漏已盡乃至獲得諸心自在最勝
波羅蜜舍利子彼佛壽量滿八十歲便般涅槃正法
住世經五百歲像法住世亦五百歲舍利流布如我

今者般涅槃後供養舍利當流布相舍利子彼佛去世入涅槃後將滿百年有一菩薩他方界終生此世界大王之家適初生已便唱是言奇哉今者生非法處又作是言奇哉今者生非法處如是唱已復作是言我於今者當行法行我於今者當行法行爾時衆人皆生疑怪以其所述同共號之名爲法行舍利子時法行王子漸漸長大諸根成滿狀年二十淨信捨家趣無上道既出家已獨止幽閑空寂林中宴處靜室時虛空中有大天神來告之曰苾芻當知汝今若求如來佛果聲稱高遠尊上法者但當勤學大菩薩

藏微妙法門若未獲者勿捨精進專志尋求無果舍利子時法行苾芻從彼天神聞斯語已心大歡喜踊躍無量身意悅豫卽行尋訪菩薩藏法躬詣村城王都國邑乃至亭館展轉尋求了無所得爾時法行苾芻復更經歷往諸僧坊或見苾芻或苾芻尼便至其所作如是言善哉仁者何處當有大菩薩藏微妙法門菩薩摩訶薩依之修學出生無量諸佛法彼便答言苾芻當知我初不聞何等名爲大菩薩藏微妙法門我於今者因汝說故方聞大菩薩藏法門名字來入我耳舍利子爾時法行苾芻重自思念如

是法門諸佛妙法不應天神妄有所說我於今者要當不捨勇猛精進乃至未聞大菩薩藏法門已來中無懈廢便更請問彼苾芻等赤蓮華勝如來般涅槃時焚身之地爲在何所汝當示我此地方面我當往彼行精進業彼苾芻等卽告之言苾芻當知如是方面是薄伽梵赤蓮華勝如來焚身之地爾時法行苾芻卽往其所到已頂禮右遶無數卽退一面結跏趺坐一心攝念想對彼佛作是誓言我於此處結跏趺坐我若不從赤蓮華勝如來現前聽聞大菩薩藏微妙法門者要當不解此坐不起此處舍利子時法行

王苾芻精進堅固發如是誓結跏趺坐過七日已東方世界有薄伽梵名曰寶藏如來應正等覺爲法行王苾芻故從彼而來現其身前爲說開示八門句法因又告曰王苾芻汝今當隨八門句法大菩薩藏微妙法門精勤修行則諸佛法不難得遂時王苾芻聞佛教已精勤修習八門句法於後不久便得成就不可思議無上多聞卽從地起離本坐處爲欲廣行毗梨耶波羅蜜多故勇猛正勤往諸村城王都國邑乃至亭館從一一處至一一處展轉宣說顯通如是大菩薩藏微妙法門滿六十歲於如是時教

化衆生天人等衆滿拘胝數皆得安住於三乘中舍利子彼王仙苾芻化衆生已臨命終時發如是言願我還生此佛世界人趣之中當修法行作是願已便就命終以願力故於此世界贍部洲中生居士家彼初生日便唱是言我於今者當修法行又作是言我於今者當修法行爾時衆人因其所述爲立本號還名法行舍利子是法行童子形如八歲淨信捨家趣無上道出家不久以宿習故大菩薩藏微妙法門無上深義自然現前法行苾芻安住如是大菩薩藏六千歲中廣行法化躬至村城王都國邑乃至亭館處

處施化爲諸衆生開示是法於六十歲教化天人滿拘胝衆於三乘中皆已成熟或住聲聞乘或住獨覺乘或住無上大乘之者舍利子彼時法行苾芻化衆生已臨命終時復發是言願我未來當得爲人出家聞法旣命終後以願力故於此世界贍部洲中生於王家彼初生日於上空中天神唱言此衆生界法勝菩薩出現於世又唱是言此衆生界法勝菩薩出現於世爾時衆人聞天告已便號王子以爲法勝舍利子法勝王子如是漸漸諸根成熟狀年二十淨信捨家趣於非家纔出家已衆人便號法勝苾芻舍利子

法勝苾芻大念慧力之所持故大菩薩藏微妙法門
自然現前精勤修習能善永斷衆生疑惑六十年中
躬事巡化遊歷村城王都國邑乃至亭館爲諸衆生
開示是法於六十歲成熟拘胝諸天人衆悉令安住
阿耨多羅三藐三菩提心舍利子法勝苾芻將欲命
終復發是言願我來世生人道中正信出家適發願
已便就命終還生此界瞻部洲中大富長者家彼初
生時復有天神大聲唱令於此世界得念菩薩今日
出現如是再返爾時衆人聞天告已皆共號之名爲
得念舍利子是得念菩薩諸根成滿狀如二十盛年
之者淨信捨家趣於非家纔出家已宿習力故便得
成就不可思議最勝無上不忘總持多聞具足六十
年中身行化導巡歷村城王都國邑乃至亭館處處
流化宣說正法斷衆生疑開示如是大菩薩藏微妙
法門過六十歲安置天人滿一拘胝或住聲聞或住
獨覺或復安住無上佛智舍利子是得念菩薩化衆
生已臨命終時復發是言願我未來生於人中正信
出家彼命終已還生此界大王之家初生之時復有
天神大聲唱告此有情界依法菩薩出現於世如是
再返爾時衆人聞天告已便名王子以爲依法舍利

子依法菩薩如是漸漸諸根成滿狀二十歲以信捨家趣於非家纔出家已宿習力故便得成就無間斷念念力持故大菩薩藏微妙法門自然現前舍利子依法菩薩而作苾芻五十年中遊行教化從一聚落至一聚落從一村墟至一村墟從城至城從館至館從國至國從一王都至一王都爲諸衆生開示如是菩薩藏法斷除疑惑於五十歲令四拘胝諸天人衆住聲聞乘住獨覺乘或住無上諸佛大乘舍利子是依法菩薩摩訶薩從是命終生於東方寶藏如來佛之世界初生之時卽得成就不可思議無上多聞教化示導六十八拘胝諸天人衆皆得成滿安住三乘舍利子是依法菩薩摩訶薩於彼寶藏如來法中化衆生已命終還來於此世界赤蓮華勝佛土瞻部洲中生大王家當於生時彼所教化六十八拘胝天人大衆皆成熟者於彼命終亦隨菩薩生此佛土與是菩薩而爲眷屬舍利子當於爾時此方世界有佛出世名最高行如來應正等覺明行圓滿善逝世間解無上丈夫調御士天人師佛薄伽梵其佛壽命滿足八十拘胝歲爾時人壽量與佛等舍利子最高行如來應正等覺處世說法一一歲中有一大會一一大

會皆有八十拘胝諸聲聞衆其佛凡有八十拘胝聲聞大會純是大阿羅漢爾時菩薩爲王子時名曰勇施成就多聞聰叡勝觀與其眷屬六十八拘胝如是大衆前後圍繞往詣薄伽梵最高行如來應正等覺所住之處既到彼已頂禮佛足遶無數匝却坐一面舍利子爾時最高行如來了達勇施王子增上信樂卽便開示本行相應微妙勝法時勇施王子聞佛開示如是法已豁然意解得清淨信心清淨故卽與六十八拘胝眷屬以信捨家趣於非家旣出家已盡其壽量淨修梵行舍利子時勇施王子彼佛法中精進經行於菩薩道其心將證無上菩提時最高行如來便爲授記告諸大衆今此苾芻勇施菩薩摩訶薩者次我滅後當證阿耨多羅三藐三菩提出現世間名大精進如來應正等覺明行圓滿善逝世間解無上丈夫調御士天人師佛薄伽梵舍利子是最高行如來授彼記已便般涅槃勇施菩薩見佛滅度戀慕增感恭敬供養如來舍利廣起靈廟利益衆生住持正法開化無量其後不久證得阿耨多羅三藐三菩提名大精進舍利子是大精進如來壽量半劫其佛說法無量大會一一集會有十二那由多聲聞弟子純

阿羅漢舍利子如是無倦精進菩薩摩訶薩爲欲修行毗梨耶波羅蜜多故鄭重殷勤尋求如是大菩薩藏微妙法門聽聞受持若讀若誦思惟研究開析義理廣爲舍生宣示演說惟功不已遂至成佛名大精進如來應正等覺出興於世廣宣法化饒益衆生如上所說是故舍利子若有善男子善女人安住大乘微妙正行欲疾證於阿耨多羅三藐三菩提者應當奮發勇猛精進鄭重殷勤尋求如是大菩薩藏法即得奉遇恭敬聽受乃至廣爲舍生宣說開闡何以故舍利子勇猛精進菩薩摩訶薩必因尋求大菩薩藏微

妙法門方得成滿毗梨耶波羅蜜多故舍利子是大菩薩摩訶薩勇猛精進勤修毗梨耶波羅蜜多爲衆生故行菩薩行若諸菩薩摩訶薩精進修行是菩薩行一切衆魔魔民天子於此菩薩不能娆亂又不爲彼異道他論所能摧屈

大寶積經卷第四十八

校論

第二紙

五行能宋南藏作應

音釋

瘥

楚懈切瘡也病除也

瘞

昨禾切小腫也

疥

古隘切瘡疥也

穡

丑六切積畜也聚也藏也

螿施隻切篋苦協切
蟲毒也箱屬

金壇居士于樹勳施貫刻此
大寶積經第四十八卷
南呂沙彌德定對
長洲徐普書
吳縣金世科刻
萬曆乙未孟夏
徑山興聖萬壽禪寺識

大寶積經卷第四十九

唐三藏法師玄奘奉詔譯

菩薩藏會第十二之十五

靜慮波羅蜜多品第十之一

復次舍利子云何名為菩薩摩訶薩精勤修學靜慮
波羅蜜多為衆生故行菩薩行舍利子菩薩摩訶薩
為衆生故具足勤修四種靜慮何謂為四舍利子菩
薩摩訶薩離欲離惡不善法故有尋有伺離生喜樂
是名菩薩安住第一具足靜慮又舍利子菩薩摩訶
薩滅尋伺故內正等淨心一趣體無尋無伺定生喜

樂是名菩薩安住第二具足靜慮又舍利子菩薩摩訶薩爲離喜故便住於捨正念正知身正受樂衆聖所說有捨有念樂住離喜是名菩薩安住第三具足靜慮又舍利子菩薩摩訶薩爲斷樂故斷苦爲先及憂喜沒不苦不樂捨念清淨是名菩薩安住第四具足靜慮舍利子菩薩摩訶薩於是靜慮定心清白無有穢濁離隨煩惱不捨深定而能發起一切靜慮種種作業是名菩薩摩訶薩依靜慮波羅蜜多故勤修如是四種靜慮復次舍利子云何菩薩摩訶薩靜慮作業所謂菩薩成就神通智業圓滿舍利子云何名

爲菩薩神通復以何等而爲智業舍利子言通智者菩薩摩訶薩成就通智具足五種何等爲五所謂天眼作證智通天耳作證智通他心智作證智通宿住憶念作證智通如意足差別作證智通舍利子是名菩薩摩訶薩五種神通菩薩於中具足成就智業圓滿復次舍利子云何菩薩摩訶薩天眼性作證智通云何神通智業圓滿舍利子菩薩摩訶薩修行靜慮波羅蜜多故得是天眼智業圓滿如是定心清淨明白又無濁穢離隨煩惱故於含識死生作證智神通其心善趣又舍利子如是菩薩摩訶薩天眼清淨明

亮顯照超過於人觀諸含識若死若生好色惡色善趣惡趣若劣若勝隨諸眾生業所積集悉能了知如是以淨天眼見諸眾生成就身惡行成就語惡行成就意惡行誹謗賢聖發起邪見彼由邪見業受因故身壞終後墮於惡趣生地獄中如是眾生成就身妙行成就語妙行成就意妙行不謗賢聖發起正見彼以正見業受因故身壞命終往生善趣天世界中舍利子是名菩薩摩訶薩天眼清淨超過於人隨諸眾生業所積集悉能明見復次舍利子菩薩摩訶薩修行靜慮波羅蜜多故所獲天眼明徹最勝過諸含生所得天眼舍利子由是菩薩所獲天眼極善明朗徹視顯現所有色相若麤若細若勝若劣若遠若近如是諸境皆對目前悉能明見又舍利子菩薩摩訶薩由是眼故一切有障諸色像等經菩薩眼徹視明明皆無障礙是故舍利子此菩薩摩訶薩所獲天眼於諸天中爲最爲勝如是一切那伽一切藥又健達縛阿素洛有學無學及阿羅漢諸獨覺等所得之眼菩薩於彼所得天眼作證智通爲最爲上爲尊爲勝爲妙爲明清徹第一復次舍利子菩薩摩訶薩修行靜慮波羅蜜多故所獲天眼諸出離道之所發生以是

天眼極善明了徹視顯現故所有十方無量無邊諸世界中麤細勝劣若近若遠一切諸色如實明見又以是眼於彼十方無邊無際諸世界中所有含識生一切趣除無色界彼一切類皆能如實了知明見又以是眼善知衆生所有業因及業果報又善了知彼諸衆生所有諸根及諸根因諸根差別悉能分別如實了知復次舍利子菩薩摩訶薩修行靜慮波羅蜜多故又以是眼能觀十方無量無邊諸佛國土功德莊嚴皆對目前悉能現見既現見已清淨修治所行戒聚卽以迴向所成佛土清淨功德之所莊嚴舍利

子是名菩薩摩訶薩具足天眼安住尸羅圓滿迴向又舍利子菩薩摩訶薩天眼清朗超過於人如實明見一切諸佛及菩薩僧既現見已彼諸正士所有軌則景行根念正智威儀聖法解脫智住證得總持勝智巧妙智慧方便善權趣入如是一切勝妙法行菩薩悉能如實明見便志勤修速令圓滿復次舍利子菩薩摩訶薩修行靜慮波羅蜜多故所得天眼清淨超人無量功德之所成就何以故是眼無障於一切色悉能見故是眼無著於一切色無執著故是眼解脫解脫一切隨眠見故是眼清淨性清徹故是眼無

依以諸境界無所依故是眼無受煩惱隨眠不執受
故是眼無翳無疑惑故是眼無縛離障法故是眼明
了證法明故是眼依智行非識故是眼無染無恚無
癡遠離一切煩惱濁故是眼隨順勝決擇分以爲聖
行之所根故是眼無礙相於一切衆生等放神光故
是眼清朗離聚亂故是眼無垢性皎淨故又舍利子
是菩薩眼能引佛眼性如虛空無所退捨是菩薩眼
無著無縛於諸愛恚皆悉遠離是菩薩眼行義境界
等行正法清淨智道於諸衆生善能安住高廣大悲
是菩薩眼於來求者無所恚礙是菩薩眼於犯戒者

曾無譏毀是菩薩眼於諸憊失能隨守護是菩薩眼
於彼懶惰能施策進是菩薩眼於心亂者示靜慮分
是菩薩眼於惡慧者施正慧眼是菩薩眼行邪道者
開示正路是菩薩眼於彼下劣信樂衆生示現如來
廣大佛法是菩薩眼畢竟能趣一切智智高廣神通
妙學現前乃至道場無有退轉舍利子是名菩薩摩
訶薩依靜慮波羅蜜多故獲是天眼神通作證智業
圓滿復次舍利子云何菩薩摩訶薩修行靜慮波羅
蜜多故獲是天耳性作證智神通復以何等神通智
業具足圓滿舍利子菩薩摩訶薩以依靜慮波羅蜜

多故勤修獲得是天耳性徹聽清淨超過於人有二
種聲人非人等若遠若近皆聞顯現舍利子是菩薩
摩訶薩以天耳性能聞十方無量無邊諸世界中一
切聲響所謂天聲龍聲藥叉聲健達縛聲阿素洛聲
揭路荼聲緊捺洛聲牟呼洛伽聲人非人聲及聞賢
聖說法之聲如來聲獨覺聲菩薩聲聲聞聲如是等
一切聲響菩薩摩訶薩以天耳性徹聽之力悉現聞
知又能了知諸弊惡趣所有音聲地獄聲畜生聲焰
魔界聲如是等無量無邊一切聲響菩薩摩訶薩以
天耳性徹聽之力悉能現聞又諸小蟲蚊蚋蠅蟻乃

至微細有命之類隨所發聲菩薩摩訶薩以天耳性
悉能現聞又舍利子菩薩摩訶薩天耳清淨若諸眾
生於心所緣起善不善發生語業以天耳性悉能了
知又能了知或有諸業善因攝受或有諸業不善因
攝受如是一切悉能了知菩薩摩訶薩又能了知或
有語業貪隨眠故瞋恚發起或有語業瞋隨眠故貪
欲發起又能了知或有語業貪瞋隨眠故愚癡發起
或有語業癡隨眠故貪瞋發起又能了知或有語業
貪隨眠故貪欲發起或有語業瞋隨眠故瞋恚發起
或有語業癡隨眠故愚癡發起如是一切隨有言說

音聲所顯悉能了知又能了知或有語業意解清淨
方便染礙或有語業方便清淨意解染礙如是一切
所有音聲菩薩摩訶薩以無礙天耳大神通智隨諸
遠近皆如實知復次舍利子菩薩摩訶薩修行靜慮
波羅蜜多故天耳通智清淨明達十方世界聖及非
聖所有音聲皆悉聽聞復能分別無有錯謬雖聞聽
已於聖音聲不起欣愛於非聖聲不生嫌嫉又於聖
聲聽聞知故獲得大慈於非聖聲聽聞知故獲得大
悲又十方諸聲一時無量菩薩摩訶薩以前後際分
齊智力天耳無亂皆如實知復次舍利子菩薩摩訶
薩以淨天耳周廣聽聞盡於十方一切世界如來遊
化刹土之處佛薄伽梵說法言音悉皆聽聞既得聞
已念器不忘一切能持不令流散如處器中堅住不
溢如是舍利子菩薩摩訶薩聞如來聲亦復如是悉
能了知堅不堅法又舍利子是菩薩摩訶薩爲聽法
故非於一佛所說法音而徧領受於第二佛所說法
音纏縛障礙何以故菩薩摩訶薩聞法無厭故雖復
前後一切如來所說法音皆能任持無有錯謬又菩
薩摩訶薩以淨天耳悉能聽聞十方世界善不善聲
此諸聲中所有顯說時非時語如是無量皆如實知

01 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 2

經

大智度論卷四十九

八

馬

舍利子何等名為時非時語舍利子諸佛菩薩善知時宜或時為眾廣說法要或時為眾略說法要菩薩摩訶薩如是諸聲皆悉聞已以一音聲隨其所應廣略開演又舍利子菩薩摩訶薩能善了知或有實可記法若為說者恐惱他故而不記別或實非可記法謂能引無義菩薩摩訶薩妙能隨順利他方便無量善巧自淨其心而便授記復次舍利子菩薩摩訶薩修行靜慮波羅蜜多故天耳清淨徹聽之力知諸聲相或時具有如是相聲應須隨喜而聽聞者菩薩摩訶薩即便聽聞如是相聲或時具有如是相聲不應

隨喜而聽聞者菩薩摩訶薩便不聽聞如是相聲又舍利子菩薩摩訶薩若處大眾說法之時眾生耳識不能清淨便以神力加被於彼令其解了說法音聲若諸眾生於一切法皆欲領解便令得聞如是法聲若諸眾生不欣諸法既無欲解便令不聞如是法聲復次舍利子菩薩摩訶薩修行靜慮波羅蜜多故獲得如是天耳通智所聞音響無量無邊又舍利子天耳性者能令諸法皆明淨故天耳性者能令智慧性清徹故天耳性者能令菩薩自清淨故天耳性者能令眾生性清淨故天耳性者極善審察如其文字所

經

大智度論卷四十九

八

馬

訶薩又能了知如是衆生有慈行根如是衆生有悲
行根如是衆生有喜行根如是衆生有捨行根悉能
了知如實分別菩薩摩訶薩又能了知如是衆生有
佛乘行根如是衆生有獨覺乘行根如是衆生有聲
聞乘行根如是一切皆能了知菩薩摩訶薩又如實
知如是衆生有強因力趣向大乘善因成就如是衆
生有強緣力趣向大乘緣因成就皆能如實分別了
知菩薩摩訶薩又如實知如是衆生有強因力成就
趣向大乘善因然此衆生由方便因生下賤家如是
衆生有強方便力雖不成就廣大善因然此衆生更

植因力生廣大家如是一切皆能了知菩薩摩訶薩
又能了知如是衆生欲解清淨非方便淨如是衆生
方便清淨非欲解淨如是衆生欲解清淨方便清淨
如是衆生非欲解淨非方便淨舍利子菩薩摩訶薩
以是通力故如是一切皆能了知復次舍利子菩薩
摩訶薩修行靜慮波羅蜜多時獲是他心通智故所
有一切衆生前際因根心行智及隨諸行說法智如
是皆名菩薩摩訶薩他心通智舍利子菩薩摩訶薩
具是智故以彼後際心入智通悉能了知如是衆生
於未來世當有戒因於現在世而有施因如是衆生

於未來世當有施因於現在世而有戒因如是衆生
於未來世當有精進因於現在世而有忍因如是衆
生於未來世當有忍因於現在世有精進因如是衆
生於未來世當有慧因於現在世有靜慮因如是衆
生於未來世當有靜慮因於現在世而有慧因如是
一切無量因行悉如實知明了通達菩薩摩訶薩又
能了知如是衆生於未來世當有出世行因於現在
世而有世間行因如是衆生於未來世當有世間行
因於現在世而有出世行因如是一切悉能了知菩
薩摩訶薩又能了知如是衆生於未來世當有大乘

因所生根於現在世有獨覺乘因所生根如是衆生
於未來世當有獨覺乘因所生根於現在世而有大
乘因所生根如是衆生於未來世當有大乘因所生
根於現在世有聲聞乘因所生根如是衆生於未來
世當有聲聞乘因所生根於現在世而有大乘因所
生根如是衆生於未來世當有獨覺乘因所生根於
現在世有聲聞乘因所生根如是衆生於未來世當
有聲聞乘因所生根於現在世有獨覺乘因所生根
如是舍利子如前所說諸有因行及以有緣於未來
世一切衆生當有是根菩薩摩訶薩以他心智通力

012345678920012345678921012345678922

故若因若行若緣皆能如實分別了知舍利子當知是諸菩薩摩訶薩於未成熟諸眾生所發起正勤方便化導不生厭倦隨彼眾生心能悟入為說正法何以故菩薩摩訶薩善知如是正法器已即便為說如是正法說法之業當無差失是故皆號之為不虛說法者復次舍利子菩薩摩訶薩修行靜慮波羅蜜多故獲是他心智業通證於現在世一切眾生心及心法次第生起如是無量悉皆了知舍利子云何名為心及心法次第轉起而能知耶舍利子菩薩摩訶薩於諸含識有貪心如實知有貪心離貪心如實知離

貪心有瞋心如實知有瞋心離瞋心如實知離瞋心有癡心如實知有癡心離癡心如實知離癡心又復能知由彼如是如是諸煩惱惑覆障如是如是諸眾生心菩薩摩訶薩皆於是等如實了知既了知已隨彼如是諸煩惱等出離正法而為宣說復次舍利子菩薩摩訶薩既具如是他心通智將欲說法往大眾中先應觀察一切大眾諸根行等差別之相既了知已如彼眾所應行而為說法舍利子當知是菩薩摩訶薩以了知眾生根心勝劣之智能悉了知眾生根心勝劣之性舍利子當知如是菩薩不妄輕毀

於自心相及他心相何以故由此菩薩摩訶薩以智
簡集心相續故如是以念簡集以悟簡集以趣簡集
以慧簡集以覺簡集心相續故離煩惱習相續斷絕
清淨無垢明徹無染無濁無躁擇照諸法隨入眾生
一切心行如是簡集心相續故舍利子菩薩摩訶薩
若能悟入如是一切心法智者是名菩薩摩訶薩修
行靜慮波羅蜜多故獲是他神通智業圓滿成就
之法復次舍利子云何菩薩摩訶薩修行靜慮波羅
蜜多時獲得宿住隨念作證智神通智業圓滿舍利
子菩薩摩訶薩以具如是宿住隨念之智力故盡於

十方徧周世界所有眾生非一種種諸宿住事悉能
隨念如是一生十生百生千生若百千生非一百生
非一千生非一百千生如是次第皆能了知菩薩摩
訶薩又能了知壞劫成劫若成壞劫非一壞劫非一
成劫非一成壞劫如是無量皆能了知菩薩摩訶薩
又知如是衆生曾於彼處有如是名有如是姓如是
種類如是色相如是狀貌如是形像如是飲食如是
久住受如是等苦樂之事菩薩摩訶薩以宿住智皆
能隨念又能了知如是衆生此處命終彼處受生彼
處命終此處受生如是此彼命終此彼受生若自若

01 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 2

他如是一切所有行相所有處所非一種種諸宿住
 事菩薩摩訶薩悉能隨念分別了知復次舍利子是
 菩薩摩訶薩以依靜慮波羅蜜多故宿住念力善能
 隨念前際所有自宿住事悉能了知又能隨念前際
 所有他諸有情他數取趣所受非一無量種種諸宿
 住事皆能隨念而得知之菩薩摩訶薩又能隨念前
 際因生自善根因又能隨念一切含識前際因生他
 善根因如是一切隨念了知舍利子是菩薩摩訶薩
 宿住智力無量方便以自善根迴向菩提能令眾生
 各自意識所有善根又令眾生於菩提心勤行攝受
 如是一切隨念能知又能隨念先世所有諸苦樂因
 善知此因皆趣無常苦無我等舍利子是菩薩摩訶
 薩既知是已於菩薩行無色憍逸無財憍逸無眷屬
 憍逸無自在憍逸無有希求轉輪聖王憍逸無有希
 求帝釋天王憍逸無有希求梵世大王憍逸無有希
 求護世天王憍逸無有希求諸處受生樂著憍逸無
 有希求諸欲之王富樂憍逸唯除為欲成熟眾生便
 以願力故受諸有舍利子如是菩薩摩訶薩了知一
 切皆趣無常苦無我故於過去世煩惱諸行善能訶
 責輕毀厭惡於現在世更不容納如是煩惱乃至命

01 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

經

大寶乘經卷四十一

一四

鳥九

難重苦因緣終不造作不善之法及諸惡業舍利子
 是菩薩摩訶薩以先所集一切善根皆悉迴向阿耨
 多羅三藐三菩提令其增廣現在所集諸善根等為
 欲攝受一切衆生遠離一切不平等迴向故是菩薩
 摩訶薩具如是等諸善根已紹三寶種令不斷絕皆
 為迴向一切智智舍利子當知菩薩摩訶薩念定之
 力乃能如是成就無量微妙善法復次舍利子菩薩
 摩訶薩修行靜慮波羅蜜多故獲是宿住妙緣隨念
 極善安住住法界故如是隨念堅固不動方便善巧
 簡擇集故如是隨念無有掉亂已善修治靜慮業故
 如是隨念無有躁擾妙奢摩他善住持故如是隨念
 無諸迷謬毗鉢舍那善攝受故如是隨念性無魯樸
 善證清淨現妙智故如是隨念能善憶持久遠諸念
 無忘失故如是隨念大寶伏藏福德資糧善積集故
 如是隨念不隨於他智慧資糧善積集故如是隨念
 已到彼岸諸度資糧善積集故如是舍利子當知無
 量無邊諸妙善法皆由念力所任持故於過去世及
 現在世發起憶念無忘失法舍利子是名菩薩摩訶
 薩依靜慮波羅蜜多故獲是宿住神通成就具足智
 業圓滿復次舍利子云何菩薩摩訶薩如意足作證

經

大寶乘經卷四十一

七

鳥九

智神通何等復名如意足通智業圓滿舍利子菩薩摩訶薩依靜慮波羅蜜多故獲是欲三摩地斷行成就修如意足如是勤心觀三摩地斷行成就修如意足舍利子是菩薩摩訶薩依如是等欲勤心觀助發定法極善修治極善成立自在轉故能善修習四如意足舍利子菩薩摩訶薩成就四種如意足已隨其願欲如意神通證得現前能示非一種種神變菩薩摩訶薩雖現無量神通變化皆爲度脫諸衆生故而修習之舍利子是諸衆生應見如是神通變化受調伏者菩薩摩訶薩隨彼所應即便顯示如是神通無量變化或現色相或現威力或冥加被衆生因是而從度脫復次舍利子云何菩薩摩訶薩如意足通現諸色相調伏衆生舍利子是菩薩摩訶薩觀諸衆生由如是等諸色像現若見若聞方從調伏菩薩即便隨其所念現斯色像或現如來色像或現獨覺色像或現聲聞色像或現天帝色像或現梵王色像或現護世天王色像或現轉輪聖王色像如是等諸餘色像菩薩摩訶薩隨所化度皆能示現乃至由現畜生色像及餘一切而調伏者即便示現如是色像爲諸衆生宣說正法復次舍利子云何菩薩摩訶薩如意

足通現諸威力舍利子菩薩摩訶薩觀諸眾生力增
上慢忿恚憍逸極懷深重由如是力得調伏者菩薩
摩訶薩隨其所應便爲示現如是神力或現摩訶諾
伽那力或現那羅延力四分之一或現那羅延力全
分之半或現那羅延力具足全分如是乃至漸致兼
倍令彼衆生調伏化度舍利子菩薩摩訶薩以靜慮
波羅蜜多如意足神通力故能以二指舉蘇迷盧最
大山王輕轉自在猶如取一阿末羅果復以山王擲
置他方無邊世界舍利子如此山王舉高一十六萬
八千踰繕那量廣八萬四千踰繕那量四寶所成高
廣第一由是菩薩住如意足雖擲異方於菩薩力無
損無減又舍利子菩薩摩訶薩住如意足故又能以
此三千大千世界如是縱廣盡其際量從水輪聚上
至有頂擎置掌中住經一劫現諸威儀無有妨礙舍
利子如是無量不可思議菩薩摩訶薩悉能隨應示
現神變舍利子菩薩摩訶薩化現成就如是大力爲
令力增上慢忿恚憍逸極重衆生見聞菩薩顯現神
變所有恃力懷慢忿恚憍逸悉皆摧滅菩薩了知既
調伏已隨其所應爲說法要復次舍利子云何菩薩
摩訶薩證得如意足通加被之智舍利子菩薩摩訶

名

三寶天經卷之十一

二

頁九

經

大寶藏經卷之十一

七

九

01234567892001234567892101234567892

名

大寶藏經卷之九

二

鳥

薩卽以如是加被智力隨所加念卽便成就舍利子
菩薩摩訶薩若欲加念深廣大海使如牛跡卽如其
念令是大海量如牛跡又欲加念微淺牛跡猶如大
海卽如其念令是牛跡量同大海又舍利子菩薩摩
訶薩若欲加念劫燒大火令成水聚卽如其念便成
水聚加念水災令成火災卽如其念火災便起舍利
子以要言之一切加念神足之門菩薩摩訶薩隨念
加之皆得成就又舍利子菩薩摩訶薩若有加念下
中上法互相轉易卽隨其念皆得成就又舍利子菩
薩摩訶薩凡所加念神通被物貞固難壞不可轉變

一切世間無有能令搖動隱沒若沙門若婆羅門諸
天帝釋魔王梵王及餘世間皆無有能如法搖動及
隱沒者唯除法王諸佛世尊舍利子當知是菩薩摩
訶薩以如是等加念持力但爲尊重種種廣大奇特
變現諸衆生等爲宣正法故現威神復次舍利子菩
薩摩訶薩修行靜慮波羅蜜多故獲得如是如意神
足無退自在超過諸魔煩惱境界趣入一切諸佛境
界是諸衆生不惱方便一切善根資糧積集一切魔
王及魔軍衆諸威德天不能遮斷舍利子是名菩薩
摩訶薩依靜慮波羅蜜多故獲是如意足作證神通

經

大寶藏經卷之九

七

鳥

智業圓滿復次舍利子云何菩薩摩訶薩依靜慮波羅蜜多故得是神通此神通者何等義理復以何等而名爲智舍利子菩薩摩訶薩若觀色像名曰神通若能了知色像盡法而不證盡是名爲智又舍利子若能聽聞一切聲響是名神通若能了知聲響前際本不可說是名爲智又舍利子若能了達衆生心行是名神通若能了知心性寂滅不證彼滅是名爲智又舍利子若能隨念過去邊際是名神通若能了知三世無礙是名爲智又舍利子於諸佛土若往若來是名神通若知國土等虛空相是名爲智又舍利子了法興起故名爲神通觀法平等是名爲智又舍利子明達諸世間故名神通不雜諸世間是名爲智又舍利子威勢映奪一切釋梵護世諸天故名神通了知一切聲聞緣覺其證下劣是名爲智舍利子諸如是等若通若智其德無量不可思議是名菩薩摩訶薩依靜慮波羅蜜多故精勤獲得如是神通智業圓滿復次舍利子菩薩摩訶薩依靜慮波羅蜜多故證得無邊深妙靜定何以故舍利子菩薩摩訶薩乃至爾所無數煩惱積集心捨菩薩於彼亦有爾所無數靜慮資糧功德安住其心又舍利子菩薩摩訶薩乃

經
卷之九

至爾所一切衆生以煩惱心生諸散亂菩薩於彼亦
應積集爾所靜慮資糧功德舍利子是名菩薩摩訶
薩所證靜慮無量無邊皆由靜慮波羅蜜多之所發
起復次舍利子菩薩摩訶薩所證之定極善深妙菩
薩應時安住於中平等引攝是處說名三摩呬多舍
利子云何名爲平等引攝舍利子三摩呬多者引攝
有情平等之性故名此定三摩呬多舍利子三摩呬
多者引攝其心平等性故又三摩呬多者引攝欲解
平等性故又三摩呬多者引攝方便平等性故又三
摩呬多者引攝增上欲解平等性故又三摩呬多者

引攝枕那平等性故又能引攝尸羅羸底毗梨耶靜
慮般羅若平等性故又三摩呬多者引攝一切諸法
平等性故舍利子是名菩薩摩訶薩三摩呬多深妙
靜慮引攝平等諸法性故復次舍利子菩薩摩訶薩
依靜慮波羅蜜多故所獲靜慮微密深妙唯智能入
亦得名爲三摩半那舍利子何等名爲三摩半那舍
利子如是妙定等諸法性所以者何若菩提平等即
是一切有情平等若一切有情平等即是諸法平等
若能平等證入是平等性是則名爲三摩半那又舍
利子若空性平等即諸法平等若能證入是平等性

經
卷之九
性
馬

是則名為三摩半那如是無相無願及以無行性皆
 平等即諸法平等若能證入是平等性是則名為三
 摩半那又舍利子若心性平等即諸法平等若能證
 入是平等性是則名為三摩半那舍利子是名菩薩
 摩訶薩獲是靜慮三摩半那平等之性皆因靜慮波
 羅蜜多故復次舍利子菩薩摩訶薩依靜慮波羅蜜
 多故獲是平等微妙靜慮於諸含識有恩無恩皆生
 平等心無簡約是故菩薩等心於地等心於水等心
 於火等心於風等心虛空無有高下亦無萎屈安住
 善住證無動搖於諸威儀心恒在定又不分別所住

威儀心性純熟樂處深定不掉不舉無有飄轉遠諸
 愚鈍言無雜亂知義知法善識諸時所謂迦羅吠羅
 及三摩耶巧能隨順一切世間而與世間性不相雜
 超越世間利等入法諸煩惱惑不能染汙離憤鬧處
 遠於所行唯常安止平等法性不捨深定而現世間
 一切作業舍利子是名菩薩摩訶薩依靜慮波羅蜜
 多故證入如是無量功德當知皆是妙慧方便之所
 發起復次舍利子云何菩薩摩訶薩依靜慮波羅蜜
 多故證是妙慧及以方便舍利子菩薩摩訶薩以大
 悲力繫心於境為度眾生是名方便證入寂靜最極

寂靜是名爲慧又舍利子若能證入佛智無礙是名方便無有一法而可慮知是名爲慧又舍利子若能證入諸法攝觀是名方便若於法性無雜思惟是名爲慧又舍利子平等證入佛身莊嚴而現在前是名方便觀察法身性無處所是名爲慧又舍利子平等證入憶念諸佛所演言詞梵音聲等是名方便觀察法性不可言說是名爲慧又舍利子平等證入其心安住金剛喻定是名方便念無散亂觀察法性是名爲慧又舍利子若如是定安住本願成熟衆生是爲方便觀察衆生皆無我性是名爲慧又舍利子若定

緣彼增上境界發起一切增上善根是名方便若能觀察無根無住是名爲慧又舍利子若定修治佛土現前是名方便觀察國土與虛空等是名爲慧又舍利子若定發起莊嚴道場是名方便若住寂靜慮知諸法是名爲慧又舍利子若定發起轉正法輪是名方便若觀所轉法輪無起是名爲慧又舍利子如是無量覺分資糧平等證入觀察現前是名方便如是無量諸惑寂滅息除熱惱如來所有靜慮妙樂不與諸法而共相應無有諸相諸相徧知遠離一切所緣境界如是皆入菩薩正定所有靜慮舍利子菩薩摩

訶薩若能如是觀察具足是名爲慧舍利子若菩薩摩訶薩成就如是無盡靜慮與靜慮波羅蜜多相應故一切惡魔不能得便卽名安住諸佛法器舍利子如是方便如是妙慧是名菩薩摩訶薩靜慮波羅蜜多具足成就皆是妙慧方便之所發起復次舍利子菩薩摩訶薩依靜慮波羅蜜多故具足成就不退神通善能建立智所作業非彼慢力之所發起遊戲神通示現世間一切作用安住神通發起世間一切大事又舍利子此神通者爲大智相具足世出世間微妙作用故此神通者爲大慧相現見世出世間一切

諸法故此神通者爲無盡相隨徧一切如虛空故此神通者等見諸色色無色中平等見故此神通者善能隨入音聲法門前際音聲平等性故此神通者能觀衆生一切心行現見彼性故此神通者善能隨念一切諸劫分別了知前後際故此神通者善能示現無量神變恒現在前無加行相故此神通者了知漏盡觀待迦羅及三摩耶不過時故此神通者是聖出世於一切法決擇分故又舍利子如是神通微妙甚深聲聞獨覺所不能測如是神通有大威德善能調伏一切有情如是神通有大功業證得灌頂一切諸

法自在轉故如是舍利子是名菩薩摩訶薩依靜慮
波羅蜜多故獲是無退諸勝神通善能建立智所作
業非彼慢力之所發起

大寶積經卷第四十九

校論

第十一紙

十五行當宋南藏作常

第十五紙

七行任宋南藏作住

音釋

錯謬

錯舍各切差錯也謬靡幼切誤謬也

魯樸

樸匹角切魯樸謂愚魯質樸也

那羅

延

梵語也此云金剛

金剛居士于玉馮施贊刻此對長洲徐晉書梁木楊應元刻

大寶積經第四十九卷秀水比丘洪智萬曆乙未孟秋徑山興聖萬壽禪寺識

大寶積經卷第五十

唐三藏法師玄奘奉詔譯

菩薩藏會第十二之十六

靜慮波羅蜜多品第十之二

復次舍利子菩薩摩訶薩修行靜慮波羅蜜多故獲
得如是無退神通善能建立智所作業舍利子當知
菩薩摩訶薩得是通智由清淨心鮮白心明潔心無
濁心離隨煩惱心善調順心善寂靜心善修治心如
是心相之所由生靜慮解脫三摩地三摩鉢底之所
發起舍利子是菩薩摩訶薩處於世界故作意生非

繫縛生不由繫縛命終受生何以故是菩薩摩訶薩
解脫一切虛妄分別故解脫一切非真實煩惱縛故
解脫一切顛倒妄執所依止故是故此菩薩摩訶薩
隨現世界解脫而生解脫命終解脫受生舍利子是
菩薩摩訶薩現受生已成辦大乘圓滿一切諸佛正
教徧遊十方廣求佛法雖志有所求而無取無得隨
入諸佛法卽爲一切法隨入一切法卽爲諸佛法如
是菩薩隨入佛法及一切法然不隨彼法非法行舍
利子諸菩薩摩訶薩若能如實求諸法時安住無取
及無得者是則無有一法而可入於算數何以故一

切諸法超過算數道故若能了達法平等性是則不
執法與非法何以故一切諸法性無執故若計於中
而有義者是則獲得廣大無義若有善能不計於義
是則義與非義不現前故不見義者於一切處覺慧
無礙是菩薩摩訶薩若能如是了覺無礙則爲獲得
無障礙覺若有無障礙覺則於一切而無所著若無
所著則無所住若無所住則無所乏若無所乏則無
癡無求若無癡無求則無迷惑若無迷惑則無
我所若無我所則無攝受若無攝受則無所執若無
所執則無諍論若無諍論是則無諍沙門之法若有

無諍沙門法者是則一切無障無礙等虚空求若能
 等彼虚空求者則不繫屬欲界色界及無色界若於
 諸處無繫屬者則無色相及以形量若具無是色相
 形量則能如是隨覺若能如是隨覺則能如是通達
 舍利子云何說名隨覺通達舍利子菩薩摩訶薩若
 能隨覺通達是處無有少法可得此則說名隨覺通
 達舍利子諸菩薩摩訶薩由平等證入如是隨覺通
 達故說是菩薩摩訶薩依靜慮波羅蜜多成就希奇
 未曾有法復次舍利子云何名為菩薩摩訶薩成就
 希奇未曾有法舍利子菩薩摩訶薩依靜慮波羅蜜

多故雖行大慈而恒觀無我雖行大悲而知無眾生
 雖行大喜而知無命者雖行大捨而知無數取雖廣
 行大施而心恒調順雖緣境淨戒而心常寂靜雖隨
 辱行忍而心無窮際雖勤加精進而心能簡集雖入
 諸靜慮而正心觀察雖徧行智慧而心無所行雖行
 四念住而心無緣念亦無作意雖行四正斷而心無
 生滅雖行如意足而心無戲論雖行淨信而心無繫
 著雖行正勤而心恒遠離雖行於念而心恒自在雖
 住三摩地而心證平等雖行般羅若而心本無相雖
 行諸力而心無摧伏雖行覺分而解析菩提雖修道

分而心無所修雖行奢摩他而心恒寂滅雖行毗鉢舍那而心無定觀雖修行聖諦而畢竟徧知雖成熟衆生而心本清淨雖攝受正法而不壞法性雖淨佛國土而心等虚空雖證無生法而心無所得雖行不退轉地而心性無退雖獲諸妙相而知性無相雖莊嚴道場而心遊三界常處周輪雖降伏魔軍而於諸含識無所摧伏雖知諸法卽菩提性而心隨覺了雖轉法輪而心住法性無還無轉雖復示現大般涅槃而於生死性心常平等如是舍利子是名菩薩摩訶薩平等證入隨覺通達如是希奇未曾有法當知修

行靜慮波羅蜜多之所成就復次舍利子何等名爲菩薩摩訶薩依靜慮波羅蜜多修學菩薩靜慮之相舍利子菩薩靜慮不住自性爲滿如是三摩地故菩薩靜慮無有愛味不爲貪著自安樂故菩薩靜慮緣於大悲爲斷一切衆煩惱故菩薩靜慮定無退轉緣於欲性增上性故菩薩靜慮發神通了達衆生諸心行故菩薩靜慮心欣愛悅善能顯發心自在故菩薩靜慮了知一切三摩鉢底映蔽一切色無色界故菩薩靜慮是爲寂靜最勝寂靜近於寂靜映蔽聲聞獨覺定故菩薩靜慮無有分別極爲究滿妙清淨故

菩薩靜慮行品最勝習氣相續永除滅故菩薩靜慮
 以慧超度超度一切諸世間故菩薩靜慮為諸舍生
 欲解導首善能度脫諸舍生故菩薩靜慮紹三寶種
 令不斷絕以佛靜慮無窮盡故菩薩靜慮最為高顯
 三摩呬多常現前故菩薩靜慮自在而轉諸有所作
 善圓滿故菩薩靜慮是為大我以妙智慧為大我故
 舍利子如是無量菩薩靜慮皆是菩薩摩訶薩依靜
 慮波羅蜜多心所集起復次舍利子菩薩摩訶薩靜
 慮波羅蜜多何等之法而為前導舍利子靜慮波羅
 蜜多者心靜觀智以為前導心住一緣以為前導心

無散動以為前導其心安住以為前導心奢摩他
 以為前導心三摩地以為前導三摩地根以為前導三
 摩地力以為前導三摩地覺分以為前導正三摩地
 以為前導靜慮解脫以為前導九次第定以為前導
 九滅除法以為前導一切善法以為前導伏煩惱怨
 以為前導三摩地蘊具足圓滿以為前導菩薩摩訶
 薩諸三摩地以為前導佛薄伽梵諸三摩地以為前
 導舍利子如是等無量靜慮皆為靜慮波羅蜜多前
 導之法舍利子復有無量無邊證寂靜法並是靜慮
 波羅蜜多之所前導舍利子是名菩薩摩訶薩靜慮

波羅蜜多菩薩摩訶薩爲阿耨多羅三藐三菩提故
當於是中發勤精進具足修學行菩薩行爾時世尊
欲重宣此義而說頌曰

靜慮解脫到彼岸

勤行此行多劫海

其心清淨無濁穢

不染世法喻蓮華

有大靜定名徧照

此定依修到彼岸

又名月光淨莊嚴

復名電光所嚴飾

或名高行或心勇

或定名爲無垢光

或戒德辯或無憂

或名諸法自在轉

或名法炬或法勇

或名山威法自在

或正法智自然超

或持正法妙清淨

或名觀察他心定

或名正法寶光明

復名滅惑嚴勝幢

有定名爲摧魔力

或名斷疑及無著

或定名爲寂靜燈

或力高勝或十力

或名敬手大名稱

或名持山善安住

或蘇迷盧大明燈

或名無勝勝彼勝

或名智炬及慧行

或無邊智或自在

或名發慧寂靜定

或名月淨日音聲

或那羅延摧憍慢

或善調龍師子吼

或名遠離種種想

或名旋轉或返還

或無瞋眼力清淨

或定名爲念諸佛

或名念法或念僧

或名智轉或入空

或名無相或無願

或名金剛喻或靜地

或名金剛地或高勝

或名山王或不瞋

或無邊轉或淨音

或離煩惱或觀察

或虛空妙或如空

或發廣大諸功德

或趣覺慧或念慧

或辯無盡或相續

或無邊說詞無盡

或無懷善作所作

或名觀察或衆悅

或名慈現或悲廣

或入歡喜或欣慶

或捨或脫二種礙

或名法光或法義

或名金剛幢或智海

或解脫堅或衆喜

或名智炬無動定

或定名曰勝蓮華

或簡集法或無動

或名慧上及寂靜

或無邊光或佛海

或名解脫或智授

或名如來妙莊嚴

或名無邊勝光焰

或名歡喜莊嚴土

或名悅豫衆生意

或定名爲一切時

順菩提道三摩地

或定名爲到彼岸

覺分華嚴施寶髻

或施甘露堅解脫

或風無動盛光明

或名海潮溝寶藏

諸那羅延山峯力

或名神通廣大義

妙善攝受三摩地

或定名爲大通照

諸佛如來之境界

證得如斯寂靜定

及餘拘胝無有邊

修行靜慮到彼岸

菩薩功德廣無量

行住恒遊靜慮境

其心無擾常愴怕

若行若臥止定中

無有威儀不在定

處定能發大音聲

以諸法性恒寂靜

無異分別無自在

無我無命無分別

如是及餘無涯際

無有數量功德海

聰叡菩薩愍舍靈

修行靜慮到彼岸

般若波羅蜜多品第十一之一

復次舍利子云何菩薩摩訶薩般若波羅蜜多菩薩
摩訶薩爲阿耨多羅三藐三菩提故依此勤修行菩
薩行舍利子菩薩行般若波羅蜜多故於菩薩藏微
妙法門殷勤鄭重聽聞受持若讀若誦思擇義理旣
能通達復爲他人廣宣敷演開示其要舍利子若有
菩薩摩訶薩聞我說已如法奉行於菩薩藏微妙法
門殷勤鄭重聽聞受持讀誦研尋通達其義爲他宣
說廣開示已當知是人證得如是無盡慧相舍利子

如是慧者爲何等相云何入證舍利子所言慧者以
聞爲相菩薩之人如理證入是故說爲無盡慧相又
舍利子如是之相我當廣說謂此相者菩薩摩訶薩
爲求正法欲樂爲相欲解爲相方便爲相善友爲相
無慢爲相於多聞所恭敬爲相尊重爲相旋遠爲相
謙敬爲相親覲爲相諦聞爲相承事爲相思惟爲相
不亂爲相珍寶想爲相良藥想爲相息諸病想爲相
念器爲相趣覺爲相樂大慧爲相證入覺爲相聞無
厭足爲相捨增益爲相調順離薪爲相親近多聞者
爲相於諸作事喜愛爲相身調適爲相心勇銳爲相

又舍利子菩薩摩訶薩於聽法衆無倦聽聞爲相聽
聞正義爲相聽聞正法爲相聽聞正行爲相聽聞證
智爲相聽聞波羅蜜多爲相聽聞菩薩藏法爲相聽
聞諸攝法爲相聽聞方便善巧爲相聽聞梵住爲相
聽聞神通爲相聽聞正念正智爲相聽聞念住爲相
聽聞正勝爲相聽聞神足爲相聽聞緣起爲相聽聞
無常爲相聽聞苦法爲相聽聞無我爲相聽聞寂靜
爲相聽聞空爲相聽聞無相爲相聽聞無願爲相聽
聞無加行爲相聽聞善根加行爲相又舍利子如是
自在爲相聞法爲相對治雜染爲相制伏一切煩惱

想爲相讚美智者爲相親覲聖者爲相遠離非聖爲
相聽聞聖者爲相聽聞諸根爲相聽聞修習隨念爲
相聽聞覺分爲相聽聞聖八支道爲相聽聞如來力
無所畏大慈大悲大喜大捨無礙辯才十八不共佛
法爲相如是舍利子當知菩薩摩訶薩若於此聽聞
卽於此解了若於此解了卽於此正行何以故舍利
子若菩薩摩訶薩於菩薩藏微妙法門聞相趣入方
便無量吾今略說四十一種舍利子何等爲相一者
若有菩薩於此法門生欲樂者當知此菩薩摩訶薩
卽爲聽聞聞便解了旣解了已便行正行二者若有

菩薩於此法門生於欲解當知此人卽是聽聞解了
行於正行三者若有菩薩於此法門方便趣入當知
此人卽是聽聞解了行於正行四者若有菩薩親近
善友此人卽爲聽聞解了行於正行五者若有菩薩
於多聞所心無有慢此人卽爲聽聞解了行於正行
六者若有菩薩恭敬多聞此人卽爲聽聞解了行於
正行七者若有菩薩於多聞者生尊重心此人卽爲
聽聞解了行於正行八者若有菩薩於多聞所旋繞
奉敬此人卽爲聽聞解了行於正行九者若有菩薩
於多聞所行謙下心此人卽爲聽聞解了行於正行

十者若有菩薩親近多聞此人卽爲聽聞解了行於
正行十一若有菩薩於多聞所攝耳諦聽此人卽爲
聽聞解了行於正行十二若有菩薩於多聞所承事
迎逆此人卽爲聽聞解了行於正行十三若有菩薩
於多聞所思惟義趣心定不亂此人卽爲聽聞解了
行於正行十四若有菩薩於多聞所起珍寶想此人
卽爲聽聞解了行於正行十五若有菩薩於多聞所
起良藥想此人卽爲聽聞解了行於正行十六若有
菩薩於多聞所能起息滅貪瞋癡想此人則爲聽聞
解了行於正行十七若有菩薩於多聞所聞已能持

此人則爲聽聞解了行於正行十八若有菩薩趣覺
於法此人則爲聽聞解了行於正行十九若有菩薩
於多聞所樂其智慧此人則爲聽聞解了行於正行
二十若有菩薩於多聞所聞已覺悟此人則爲聽聞
解了行於正行二十一若有菩薩聞無厭足此人則
爲聽聞解了行於正行二十二若有菩薩聞說陀那
便增長捨此人則爲聽聞解了行於正行二十三若
有菩薩聞說尸羅便守護戒此人則爲聽聞解了行
於正行二十四若有菩薩聞說麁底便能修忍此人
則爲聽聞解了行於正行二十五若有菩薩聞說毗

梨耶便起正勤無倦精進此人則爲聽聞解了行於
正行二十六若有菩薩聞說靜慮便入靜慮其心不
散此人則爲聽聞解了行於正行二十七若有菩薩
聞說般羅若其心決定便修智慧爲盡諸漏此人則
爲聽聞解了行於正行二十八若有菩薩於多聞所
生大歡喜此人則爲聽聞解了行於正行二十九若
有菩薩聽聞法已身調適者此人則爲聽聞解了行
於正行三十若有菩薩聽聞法已其心勇銳此人則
爲聽聞解了行於正行三十一若有菩薩聞大乘經
心生信欲此人則爲聽聞解了行於正行三十二若

有菩薩聞攝法已其心趣入此人則爲聽聞解了行
於正行三十三若有菩薩聞說念住便即趣於身受
心法此人則爲聽聞解了行於正行三十四若有菩
薩聞說正勝便於惡法已生未生若背若捨若彼善
法已生未生不捨覺轉此人則爲聽聞解了行於正
行三十五若有菩薩聞說神足即能奉行生身輕性
生心輕性生欲輕性此人則爲聽聞解了行於正行
三十六若有菩薩聞說靜慮便靜思惟其心趣入此
人則爲聽聞解了行於正行三十七若有菩薩聞諸
法中不輕慢行便於衆生起大慈心於人苦者起大

悲心於正法所起大喜心於不善所起大捨心此人
則爲聽聞解了行於正行三十八若有菩薩聞說根
已其心趣入於彼諸根所謂信根精進根念根慧根
三摩地根此人則爲聽聞解了行於正行三十九若
有菩薩聞說覺分其心趣入覺悟法性此人則爲聽
聞解了行於正行四十若有菩薩聞說道支其心趣
入涅槃正路此人則爲聽聞解了行於正行四十一
若有菩薩聞說如來力無所畏大慈大悲大喜大捨
無礙辯才十八不共佛法及餘無量諸佛正法皆聽
聞已其心趣入阿耨多羅三藐三菩提此人如是如

法聽聞既聽聞已便能解了既解了已行於正行舍
利子我已說是四十一法趣入聞相諸菩薩摩訶薩
當於中學舍利子如是名爲菩薩摩訶薩修行般若
波羅蜜多聞慧本相復次舍利子菩薩摩訶薩修行
般若波羅蜜多行菩薩行者應於如是大菩薩藏微
妙法門鄭重聽聞受持讀誦思惟其義通達旨趣復
爲他人廣分別說是行資糧舍利子云何菩薩摩訶
薩於如是法而起正行舍利子菩薩於法起正行者
所謂如說修行建立而住是名於法而起正行若復
有能一切不取是名於法而起正行何以故舍利子

若取於法卽名邪行無處無位執取法人由如是法
能得出離必無是處何以故無取行人於法無行尚
應生疑無作用故況取法行而非邪行是故應當不
取諸法而行正行又舍利子若於諸法無有障礙是
名正行若於諸法不輕蔑者是名正行若於諸法不
取不捨不生不滅是名正行乃至若於諸法無合無
散是名正行又舍利子如我所說若有是處無有少
法而可見聞亦無可說如是一切諸法非可得見非
可執取何以故一切諸法皆是一相所謂無相又舍
利子一切諸法性本無相若有菩薩說於無相是則

無相還應可說何以故無相有相皆無相故不可說
言此爲有相此爲無相舍利子若有菩薩摩訶薩能
悟如是一切法相卽是無相不可得見不可執取如
法了知是名正行菩薩摩訶薩勤修如是正法行已
當於諸法證入無障照明之慧如是舍利子是名菩
薩摩訶薩般若波羅蜜多正行之相爾時世尊欲重
宣此義而說頌曰

安住正行聰睿者

於菩薩藏善決定

此人於法不起執

無執取行相如是

證得諸法不爲空

非於諸法空平等

又非空法有所執 無執正行相如是

於法無取亦無捨 亦非取法以爲法

無取是名諸法相 無取正行相如是

若於諸法智無礙 此智無有不焚燒

於焚燒智無所執 諸法正行相如是

智者安住遠離德 於法應起勤精進

若能依止軌則行 爾時當入清淨門

是清淨門通諸法 亦了有情諸欲解

智者雖知無所觀 而能演宣如是法

於甚深法了勝義 常於深義勝決擇

踊現無邊功德行 明智多聞如大海

於彼所說諸文義 究竟無能證得者

以彼文義俱無邊 眞實正行恒無動

復次舍利子菩薩摩訶薩修行般若波羅蜜多時於
菩薩藏微妙法門殷重聽聞乃至爲他如法說已當
知是菩薩摩訶薩於一切法獲得光明能破一切無
明黑闇及諸翳膜舍利子如是光明卽爲智慧何以
故善不善法皆能明了如實知故是菩薩摩訶薩修
如是法獲明慧已乃至命難衆苦因緣決定不造諸
不善法舍利子是菩薩摩訶薩爲欲永滅不善法故

隨所聞法極善通達既通達已是則說爲牟尼寂靜
如是舍利子是名菩薩摩訶薩修行般若波羅蜜多
時正行之相爾時世尊欲重宣此義而說頌曰

如人入闇室 覆蔽絕光明 雖有衆色像
非明眼所見 如是隨有人 內具諸明解
不聞於正法 善惡何能曉 多聞解了法
多聞不造惡 多聞捨無義 多聞得涅槃
善聽增長聞 聞能增長慧 慧能修淨義
得義能招樂 聰慧得義已 證現法涅槃
淨覺法相應 證得第一樂 聞菩薩藏已

正法善安住 爲世大光明 行菩提妙行

復次舍利子菩薩摩訶薩爲欲修行般若波羅蜜多
故於能受持菩薩藏經正行人所深起敬心善知識
想既生想已又於大菩薩藏微妙法門倍復尋求令
此法門轉增明淨舍利子是菩薩摩訶薩爲求菩薩
藏故發生信欲策勵正勤檢攝其心令定安住是菩
薩摩訶薩於四正斷方便修成一切法中得無障礙
如是舍利子是名菩薩摩訶薩般若波羅蜜多正行
之相爾時世尊欲重宣此義而說頌曰

所謂說法者 卽爲善知識 恭敬聽聞法

安住於正行 欲解常無退 精進常高勇

淨慧常修治 於智常安住 自然達諸法

不隨於信行 以智觀於法 是為諸佛說

智者分別句 趣義善加學 於白黑品等

常修常遠離 心曾無厭倦 於法無退沒

身欲並輕安 速得心精進 由聞法增智

智增無退念 智恒依念住 了知淨穢法

學於無上法 勝趣念慧力 了眾生欲解

自學於長夜 學法已昇進 極進智清淨

了眾生欲解 如解便開示

復次舍利子菩薩摩訶薩修行般若波羅蜜多時於

菩薩藏微妙法門如是尋求通達覺慧依是清淨善

法明門菩薩常應如是修學舍利子若有菩薩摩訶

薩於法修學應作是念二因二緣能發正見何等為

二所謂從他聞音及以內自如理作意彼復思惟從

他聞音如理作意為何等相尋重思惟若有樂定修

相應行諸菩薩等未曾聽聞大菩薩藏微妙法門又

不聽聞聖法律教但於三摩地中生知足想當知是

人以慢力故起憎上慢我說是人不能解脫生老病

死愁歎憂苦諸熱惱等既不脫諸熱惱等苦豈得脫

彼五門生死爲之沉溺流轉不息是諸衆生實非解脫而便自謂我已解脫實未離苦而便自謂出離衆苦是故如來依是人故如實說法若能從他隨順聽聞是則解脫諸老死等復作是言如我先聞薄伽梵說

多聞解了法 多聞不造惡 多聞捨無義

多聞得涅槃 善聽增長聞 聞能增長慧

慧能修淨義 得義能招樂 聰慧得義已

證現法涅槃 聞法淨點慧 證得第一樂

是故舍利子諸菩薩摩訶薩如是思已當於大菩薩

藏微妙法門及以聖法毗奈耶教殷重聽聞受持讀誦廣爲他人敷演開示復次舍利子若諸舍識於菩薩藏微妙法門雖復聽聞而不如理方便作意當知是人於彼聖道不能正行是故如來依是人故說正法要作如是言若欲解脫生老病死當具內自如理思惟諸菩薩等應如是學舍利子云何名爲如理方便何等菩薩如理作意而能修學舍利子菩薩摩訶薩如理方便者無有一法若合若離何以故如理方便非方便故又舍利子菩薩摩訶薩若有安住如理方便及作意者當知此相但是音聲而此音聲性無

所起亦不轉起及由彼故而發音聲何以故彼一切皆不可得故又復菩薩觀是音聲前際後際從何而生滅往何所如是觀察了不可得又更推求如此聲者爲在已說爲在今說爲在當說又重推求如是聲者若已所說若今所說若當所說如是聲者若爲斷故已說若爲斷故今說若爲斷故當說如是聲者若爲證故已說若爲證故今說若爲證故當說是菩薩如是一切尋求聲已都無得者又更觀察若過去相若未來相若現在相如是觀已皆不可得舍利子若菩薩摩訶薩如是正觀察時是名如理方便作意是

故如理方便菩薩摩訶薩於如是觀應具修學復次舍利子云何菩薩摩訶薩如理觀耶諸菩薩等云何應學舍利子是菩薩摩訶薩觀一切法自性息滅若如是觀名如理觀若觀諸法自性寂靜是則名爲如理正觀若觀諸法畢竟空寂是則名爲如理正觀若觀諸法入平等性是則名爲如理正觀若觀諸法畢竟無生是則名爲如理正觀若觀諸法畢竟不生是則名爲如理正觀若觀諸法畢竟不起是則名爲如理正觀若觀諸法畢竟寂滅是則名爲如理正觀舍利子是菩薩摩訶薩作是觀時亦不見有能觀之者

應如是觀所謂非觀非不觀故若有菩薩作是觀者
名如理觀若他觀者名非理觀復次舍利子云何菩
薩摩訶薩應學如是如理方便舍利子菩薩摩訶薩
如理方便者非於少法有愚迷故如理方便者非於
少法而生障礙如理方便者無有少法非解脫門如
理方便者無有爲斷少分法故發勤精進如理方便
者不爲證少法故勇勵正勤舍利子菩薩摩訶薩應
以如是如理正見如其所見正觀諸法舍利子云何
名爲如其所見正觀諸法舍利子謂無所見名觀諸
法何等是爲無所見耶舍利子無所見者名爲無生

言無生者是爲無起言無起者名無所照是故如來
依是正法說如是言若有菩薩觀一切行見無生時
卽是趣入正性決定夫正見者謂能趣入正性決定
舍利子彼菩薩摩訶薩作是思惟何因緣故當得趣
入正性決定舍利子菩薩摩訶薩應如是學若觀我
見爲平等者卽是一切諸法平等若作是觀當知趣
入正性決定是故諸菩薩摩訶薩若欲趣入正性決
定者當於如是大菩薩藏微妙法門殷重聽聞受持
讀誦研窮義趣復應爲他如法廣說便當於是法門
如理方便作意修學舍利子如是名爲菩薩摩訶薩

爲阿耨多羅三藐三菩提故修行般若波羅蜜多行
菩薩行

大寶積經卷第五十

音釋

三摩鉢底

梵語也亦云三摩提此云等持卽禪定攝心也 瞋式

切目 銳

以芮切

翳膜

翳於計切障也蔽也膜當 點

慧

黠胡入切亦慧也

翰林院檢計金壇王肯堂施贊刻此

大寶積經第五十卷

秀水比丘洪智對

萬曆乙未孟秋徑山興聖萬壽禪寺識

長



二十

文

ノ
利
系
三